

SIBAKA SA LUKISIZE

MULIMU SA KULAPELELA



Ha lu inamiseni litho za luna fa nako nyana.

Ndate Yomunde yakwa Lihlimu, kaniti lu talima kuli le ki lithonolo fa kuba mo kacenu mwa muleneñi wa Los Angeles, mi mwahala ba, balumeli kuli . . . baba Ketilwe baba bizizwe kuzwa mwa lifasi, bana baba kauhani ba Mulimu, mwa hola tuna ye lupila ku yona ye, mwatasa tibeledo tuna ye ya kubonahala kwa Mulati wa luna, yena Mulena Jesu, ka nako ifi kaufela. Lwa itumela ku Wena ka se mwa lipilu za luna, ni ku lumela kuli Uka taha mwa lusika lwa luna. Lu Mu libelezi kacenu. Haiba Haayo fa kacenu, mi luba teñi mo kamuso, luka Mu libelela kamuso.

² Mulimu Yomunde, lu lapela kuli mukopano wo ukaba fela—fela mukopano o ipitezi. Mane haibe nako yeo lu ka ba ni pi—pi piho ya zwelopili ya Keleke, ye kaba mwa Libuka za Hao mwa Kuyakuile. Fuyola kuikataza kokufola kaufela ko lubeya mwateni, Ndate. Lu lemuha kuli lwapalelwa luli kusina Wena, kacwalo he lu swanela kuba ni Wena, Mulena, haiba lukona ku zwelopili. Mi halu lati taba ye kwa kanya ya luna fela. Lu bata taba ye kwa kanya ya Hao. Kakuli yeo kona tato ya lipilu za luna, ki kubona Jesu ha fiwa kanya mwa sicaba sa Hae. Ili kutiisa tumelo ya bani, Mulena, mwa lizazi le ndwa haise ili ye tata hahulu, lutile mwa ancafazo ye mwahala luna, ni ancafazo, ili pumulo nyana. Lu lapela kuli U alabe lika ze kaufela ku luna, kakuli lwa kupa ka Libizo la Jesu. Amen.

Ha muine.

³ Muzwale Shakarian, Kezeli Wyatt, ni kwa balikani ba Mulena luna Jesu Krete, Ni itumela hahulu ka kolo ye ya kuba mwa Los Angeles hape, ku to kutaza ka za Jesu ya kanya yo kaufela lutezi mo ku to ituta hahulu za hae kacenu. Haiba kuikataza kwa luna . . .

⁴ [Yomuñwi ubulela ni Muzwale Branham kuamana ni maikulofoni—Mu.] Eeni, muñaka. [Hakuna manzwi fa tepu.] . . . mufuta wo. Ye ki taba yetata nyana. Lubulele, kuli nto ye hailati ku swalisana. [Babañwi ba bulela mwa ku cunela maikulofoni.] Kihande, haina kubeleka cwalo. [Hakuna manzwi fa tepu.] . . . Muzwale Shakarian. Cwale seo si utwahala hande.

⁵ Ni mufuta o munyinyani, nina ni linzwi le li nyinyani, mi kono ni lwezi Liñusa lelituna kuzwa ku Mulena. Twaniso yetuna izwelela ku Satani, kuli ni si ke na Li tisa, kono lu ka fita kulo fa kupale kumane. Lu sepa kuli ye ikaba sunda yetuna ku luna kaufela.

⁶ Ne ni inzi fani inge ni nahana kuli ki linako zekai zeo Muzwale waluna yomunde nyandi Thomas Wyatt, hakuna kukakanya, na bulezi kuzwa fa katala fa, mutanga yomutuna ku Kreste.

⁷ Ne ni ziba Muzwale Wyatt. Nali fela susumezo yetuna kamita ku na foo hane Ni ka kopana ni yena ni kuambola ni yena. Na hupula, inge ni sali fela mukutazi wa mushimani, nako kaufela nakona . . . buka ya hae, yebizwa, *Mafufa A Foliso*. Na lata mukanga wani, *Mafufa A Foliso*.

⁸ Mi lutabile fa kuba mo mwa tempele ye neezwi sebelezo ya Kreste. Mulimu afuyole mbelwa wa hae, ni mina sicaba kaufela baba . . . Luli, Na ziba mwa mu tonda, ni mina. Ne ni mbwinjize tukiso ya hae, fani ha Ni utwa kuli na sa ile. Ne ni tabela kuutwa linzwi la hae. Na ya inza supala nyana, kono na sa lwezi linzwi leli tiile, mi—mi nana ni liñusa kuzwa ku Mulimu. Mi bupilo bwa hae bu sa pila ku mina sicaba. Mi mwa masimu a tumo kwa na lumile likwata zani kaufela, ni zeñwi cwalo, Evangeli isa zwelapili ona cwalo bakeñisa Thomas Wyatt. Mane moyo wa hae u pumule mwa kozo kufitela nako ye lu mu katanyeza mwa Naha ye kanya yani ko kusina lifu kamba busupali. Luteni mo kuli lu zwelepili cwale kufitela nako ya luna i bizwa kamba zuho yetuna foo Jesu ha taha ku to lu nga kaufela luna.

⁹ Cwale Ni ziba kuli muna ni sebelezo kwanu, Na sepa, busihu boo. Mi Ni bulelezwi, fa nako nyana yefitile, kuli—kuli muna ni sebelezo kwanu busihu boo, kacwalo Ni kakufa kapili mo ku konahalela.

¹⁰ Kakuli, Nina ni la Mubulo busihu, la Bubeli busihu, la Bulalu busihu, ni zeñwi cwalo, biki ye, kacwalo Ni sepa kuli Mulena uka lu fuyola. Lu ka lapelela bakuli. Lu ka kutaza Kreste, haiba Uka lata, haiba ki tato ya Hae, mwa mata kaufela a zuho ya Hae kuli Uka lu lumeleza kueza cwalo. Mi kaufela Sa fa kueza, seo lu tabela kueza ka lipilu zaluna kaufela. Mi Ni—Ni ziba kuli Uka lu fuyola haiba lu ka Mu lumela fela.

¹¹ Mi cwale lu si ka apula fela Linzwi, ku Li bala, Ni bata kuambola ku Yena hape, halunze luinamisa litho zaluna ni kukuza cwale, ni kusepa kuli kulyangana ku felile. Lwa lemuha, Bakreste kaufela ba ziba, kuli sila, sila sa luna, sibeleva kwa maneku kaufela. Kono, mwabona, fani lika ze cwalo ha li ezahala, mu kuze fela. Mulimu wa ziba zeo lili zona. Mwabona, muine fela mukuzize, hakulata U sweli kueza sika so sa zibi zeñwi ka zona onafa cwale. Ha lu amboleñi ku Yena.

¹² Ndate, lu lapela cwale kuli U kuzise liwate, Mulena Jesu yamata kaufela atahe inza zamaya fa Linzwi la Hae cwale, kuzibahalisa ku luna, mwa kalulo yenca, ni mata a Hae ni liponahazo. Lwa kupa se, halunze lu bala Linzwi la Hae, mane ha Li fe bupilo kwa lipilu za luna kacenu, kuli lukone ku Mu

ziba, mwa mata a zuho ya Hae. Kakuli lwa likupa ka Libizo la Jesu. Amen.

¹³ Cwale haiba muka apula mwa Buka ya Deuteronoma. Ni bata kubala timana, kamba zepeli, kuzwa mwa Buka ya Deuteronoma, kauhanyo ya 16 ya Deuteronoma.

U mamele kweli ya Abibi, ye talusa kuli Lungu, ni ku ezeza MULENA Mulimu wa hao paseka: kakuli mwa kweli ya Abibi MULENA Mulimu wa hao . . . na ku zwisize mwa naha ya Egepita busihu.

U ka bulayela MULENA Mulimu wa hao paseka, u mu bulayeke kwa likomu ni lingu za hao, mwa sibaka sa ka beya MULENA . . . (muni swalele) . . . mwa sibaka sa ka keta MULENA ku beya libizo la hae ku sona.

Usike wa ca buhobe bo bu beilwe mumela; ka mazazi a sebene u ce mahobe asina mumela, mi kikuli mahobe a maswabi; kakuli u zwile mwa naha ya Egepita ka putako: . . . u hupule lizazi lo no zwile . . . kuzwa mwa naha ya Egepita ka mazazi kaufela a bupilo bwa hao.

Mi ka mazazi a sebene kusike kwa bonwa mumela ku wena, likamba kaufela, mazazi a hao kaufela a sebene; haili nama ya sitabelo so eza . . . naihaiba, sitabelo so eza lizazi la pili nako ya manzibwana, kusike kwa siyala sesiwi sa yona ku isa kakusasana.

Usike wa eza paseka ku ufi ni ufi wa minzi . . . ya hao ya ka kufa MULENA Mulimu wa hao:

Konji mwa sibaka sa ka keta MULENA Mulimu wa hao kuli a beye libizo la hae ku sona, ki mona mo ka ezeza paseka manzibwana, ni lizazi ha li likela, ka nako yo no zwile ka yona mwa Egepita.

¹⁴ [Mbututu wa lila mwa kopano—Mu.] Kubonahala kuli luna ni butata hape. Ni lumela kuli Na kona kuhuwa katata kufita cwalo. Uh-huh.

¹⁵ Ki tuto yenca luli ye Ni bata kubulela nyana fa nako yelikani, musihali wo, ya kuli: *Sibaka Sa Lukisize Mulimu Sa Kulapelela.*

¹⁶ Cwale, se ki se ipitezi. Kono sina ha Ni bulezi, linako zeñata kwa mulaho, kuli Mulimu kamita upila mwa mikwa ye ipitezi, libaka ze ipitezi, u ezanga lika ze ipitezi, kakuli Yena ki ya ipitezi. Yo kaufela ya lumela ku Yena, u eza likezo ze ipitezi. Kuna ni lika zeñata, lika zeñata ze lu tabela kubulela ka za buipiteli bwa Hae. Kono Ni ziba kuli kaufela, baba Mu twaezi hande, ba ziba kuli Yena ki ya ipitezi, u ezanga lika ze ipitezi, fokuñwi linako zeñwi ibanga ka linako ze ipitezi. Kacwalo lu sepa kacenu kuli Mulimu uka fuyola yona, palo ya Linzwi ye, mi ni palo ye Ni ketile kuambola ku mina ka yona.

¹⁷ Cwale, se Ni nahana kuli kona se si tisize butata bwa luna fa, neli kuli, ba puma matepu rekoda ani mwani, ni kuhoha fela

mata a magesi kuzwa kwa maikulofoni. Kacwalo, haiba ha ba li lukisi, kupalañi, mu ka ni utwa nihakuli cwalo. Mulimu uka lukisa lizebe za luna kuli lukone ku utwa.

¹⁸ Libaka le Ni batela ku bulelela taba ye, mi ki nako yende ya kueza cwalo, kwa mukopano wa Baana ba Pisinisi Yetezi ya Evangeli, kakuli likeleke kaufela, kamba buñata bwa zona, li yemelwa mwa sikwata se, likopano ze shutana kaufela.

¹⁹ Mi Ni fumana, linako zeñata, kuli sicaba, ne si katananga mwa mukwakwa, mwa linzila za makululu, ni mwa lifulai, litima, limbasi, ha Ni li kubona kuli, “Kana u Mukreste nji?”

²⁰ Alimuñwi wa bona ukali, “Kihande, Ni wa Methodist. Ni wa Baptist. Ni wa Presbyterian. Ni wa Lutheran. Pentekota,” kamba nto yeñwi ye cwalo.

²¹ Mutu ni mutu una ni kopano ya tabela ku yemela. Mi zeo li lukile hande ku yemelwa ki kopano, kono, niteñi, siemba se si maswe sa yona, kuli mutu ni mutu unahana kuli sikwata sesiñwi se kona fela sikwata sinosi se—se si ka ya kwa Lihalimu, mi ki sona sinosi fela seo—seo Mulimu a yemelwa ku sona, ni hanyinyani, ki sikwata sa mutu yomuñwi cwalo. Ni hupuzi kuli musihali wo ikaba nako yende ya kufeza litaba zeo. [Kopano ya kambela—Mu.] Mi hakulata kona libaka Satani za sweli kulyanganiseza maikulofoni ye. Mwa ziba, sika kaufela sa eza mutu si na ni ku fosahala, kono sa eza Mulimu ha si fosahali. Kacwalo ka kuba ni nako yende ya kueza cwalo, sibaka sesinde sa kueza cwalo, kacwalo, Mulimu alu tuse kuli, ka sishemo sa Hae, lu ka lika kueza mo lukonela kaufela kuambola ka zona.

²² Cwale palo ye, yezwa mwa Buka ya Deuteronoma. Ni utwisisa kuli Deuteronoma . . . sina ha Ni na ni Mañolo amañwi ni lika zeñozwi fa.

²³ Ne kubanga kuli Ne ni li hupulanga kapili, kono kuzwa fo Ni fitelezi lilimo ze mashumi amabeli ka ze ketalizoho, ka nako ya bubeli, ibanga nto yetata kuli ni a hupulange kaufela. Kacwalo, Ni kenanga mwa muzuzu ni kulapela. Mi sina Ha ni fa Mañolo, Na a ñola, mi mwendi ni banga ni kapepa fa ni fa, ni zona, kuli nibe ni booko bwaka inge bu sebeza mo ne buinezi fani Ha ni fa bona.

²⁴ *Deuteronoma* kakuli ki linzwi la Sigerike le litalusa “milao yemibeli,” linzwi *Deuteronoma*. Mi Mulimu una ni milao yemibeli.

²⁵ Mi ulimuñwi wa yona ki mulao wa lifu, ku sa utwela Linzwi la Hae. Lu fumana kuli, foo Eva ha hana ku utwela Linzwi la Hae, la tisa lifu. Wani ki ulimuñwi wa milao ya Hae, “Zazi le mu ka ca kuyona, lona lizazi leo mu ka shwa.”

²⁶ Mi kipeto Una ni mulao omuñwi, ili mulao wa Bupilo, wa ku utwela. Haiba mu sa ezi sa *kuli* ni lika zeñwi, kupalañi, kubuluka Linzwi la Hae, mu ka pila.

²⁷ Lishetumuka fa lika zepeli, ku ya ka mo ni nahanela, kuli, ikaba kubuluka Linzwi la Hae kamba kusa utwela Linzwi la Hae.

²⁸ Ilinwi ya yona milao ye ne filwe fa Lilundu la Sinai. Mi omunwi neli. . . Wani kona mulao wa lifu. Mulao omunwi no filwe fa Lilundu la Kalvari, kone ku filwe mulao wa Bupilo, ka Krete Jesu.

Yena hape una ni bulikani bobubeli.

²⁹ Nana ni bulikani ni Adama, mutu wapili fa lifasi. Mi bulikani bwani nebulo fa milao, “Haiba u eza sa *kuli-ni-kuli*, Ni ka eza sa *kuli-ni-kuli*.” Adama nana ni sa kuesa kuli abeye buitamo bo bu pila fapila Mulimu. Nana ni ku zamaya mwa linzila za Mulimu, inza buluka Linzwi la Hae kaufela, kusina kusikamisa Linzwi li liliinwi.

³⁰ Kono kipeto ki Ha eza buitamo bobunwi, mi bwani neli ni Abrahama. Buitamo bo ne bu si ka milao, kono ne busina mulao. Mulimu na file buitamo ku Abrahama, ne kusina ze ne tamilwe kwateni, ni hanyinyani. Kusina milao! Isini kuli, “Nika eza cwalo.” “Ni ezize! Ni li ezize kale zeo.”

³¹ Mi wani kona mulao o Bakreste ba lukela kupila ka ona. Ha ki se lu eza ka luna bani, kono ki Sa lu ezelize. Krete sa talekilwe kuba sitabelo. Isini kuli, “Uka ba cwalo.” U bile kale cwalo! Ki sibana se si felile. Na pilile, a shwa, azuha hape, a kambamela kwa Lihlimu, ukutile mwa mufuta wa Moya o Kenile. Kacwalo, ki musebezi o felile, ni Mulimu. Krete, kusina kuziba sibi, sa to ba sibi saka, kuli Ni kone ku yema mwa sibaka sa Hae, Na ngile sibaka sa ka. Ne nili ku Yena, fa Kalvari, fani ha Na shwile. Kwani Ni lukela kushwa ni Yena, kuli nipile. Kakuli mulao wa sibi ni lifu u mwa mubili, una ni kushwa, kuli u kutise ku Yena.

³² Kono cwale lu ikungela manzwi elukona kuitusisa, litaba zetuna ze, zeo kaufela lu twaezi bunata bwa zona, ni mifuta yemituna ya Liñolo. Kono, musihali wo, lu talimana ni ye, kuli, mwa pata ya se kaufela, U sa bulela kuli kuna ni fela sibaka silisiinwi ko Aka mi katanyeza, fapila lituto za luna ze shutana kaufela. Lu bile ni bulapeli bwa Sijuda. Lu bile ni bwa ba Mohammedan. Lubile ni. . . Luna ni mifuta kaufela ya lituto za litumelo ni kopano, likeleke, ni zeinwi cwalo, kono niteini Mulimu naize kuna ni fela sibaka silisiinwi ko Aka mi katanyeza. Libaka zani kaufela, yeinwi ni yeinwi ibulela kuli, “U kopananga ni keleke yaka. Mi haiba ha mu fumanehi kwa keleke yaka, Hana—Hana ku kopana ni wena. Mina, mu lukela fela kuba mwa sikwata se kusi cwalo Yena—kamba Yena hana ku mi katana kwani. Kamba, Haana ku ku katana kusili fela konji ona mwani, nitaluse.”

³³ Mi konakuli lufumana cwana fa kuli Una ni sibaka silisiinwi, ki sibaka fela silisiinwi. “Uka fa sitabelo mwa sibaka sa ka keta Mulena Mulimu wa hao ku mu bulayela sitabelo.” Cwale Una ni

sibaka se si ketilwe ko Akopana ni bana baba lapela, mi neba sa lukeli kubulayela sitabelo kwa sibaka sisili fela konji mwa sibaka silisiñwi sani. Sibaka sesiñwi kaufela ne si sike sa beleka. Nana ni sibaka silisiñwi ko Na ka kopana ni bona. Mi sibaka silisiñwi, fela, kona ko Akopana ni mulapeli.

³⁴ Konakuli, haiba yeo ki niti, kihande lube baba tokomela hande kuli lufumane sibaka sani. Ni sepa kwa lu lukela, kuli, kakuba batu baba ziba kuli lwa shwa, ni kupila mwa lusika lo lushwa, lupila mwa lusika lo lushwa, lupila mwa naha ye shwa, mwatasa situwa sa lifu.

³⁵ Mi lifasi le lina ni kutaha kwa mafelelezo cwanonu. Halikoni kuya hahulu fahule. Sibi si tungile hahulu. Si fitelezi sepo. Hakusana sepo hape kwa lifasi. Si fitelezi seo.

³⁶ Ni lumela kuli Moya o Kenile usweli kububula mwa masimu, kufumana yomuñwi *yo* ni yomuñwi *yani*, kakuli hola se i felile. Evangeli i kutalizwe mwa naha kaufela, milao ni lika zeñwi li latelezi, kono niteni Evangeli izwezi pili ka kuswana.

³⁷ Mi cwale, kwa nako ya maungulo, lu bona lika ha li ezahala ka mo li inezi, kuna ni temuso yetuna mwahala sicaba se si ketilwe sa Mulimu, kuli ba fumane se si lukile. Mi kwa lu lukela kuziba cwalo. Cwale, ha ki tuto ya mutu, kono ki kuziba sesili Niti, se ibulela Bibeke kuli kona Niti. Kakuli, nako ikabe ifelile leliñwi la mazazi aa, ku luna, mi le mane ikona kuba lizazi lateñi, kacwalo ha lu talimeñi hande ku za bulezi Mulimu.

³⁸ Muhupule, Mulimu foo ha bulela Linzwi, Hakoni ku li kutisa mwa mulaho. Una ni kusiyala ali yaswana. Hakoni kubulela sika, mi kipeto ni kubulela kuli, “Kihande, Ne—Ne ni sa talusi sani.” Mwabona, Yena ha cinci. Wa ziba zende, ka kukala. Lu bulela lika ze lu nahana kuli li lukile, mi kasamulaho nyana lwa li kutisa ka kuinyaza. Kono Mulimu hakoni kuezwa cwalo, mi asiyale ali Mulimu. Kacwalo haiba Yena cinci, Ha—Ha ezi cwalo, kakuli U petehile mwa Linzwi kaufela. Ha buleli Linzwi konji haiba ki la Kuyakuile. Za Hae za Kuyakuile kaufela nelili ni Yena kwa simuluhu, minahano ya Hae, milelo ya Hae, mi isweli fela kuiponahalisa ili zona mwa lifasi kacenu.

³⁹ Cwale, muhupule, Una ni sibaka se si lukisizwe, sibaka silisiñwi ko Aka kopana ni bana baba lumela. Kusili kaufela hakuna kubeleka.

⁴⁰ Muhupule, Jesu naize, fani ha Na li fa lifasi fa, kubulela kwa sikwata sa batu beneli ba bulapeli hahulu, babande luli, baba lutilwe hande, sicaba se si na ni ciseho luli, ka Mulimu, kono Jesu ali ku bona, “Mu Ni lapela mbango,” ka ku luta batu Lituto za lizo za batu. Muhupule ka mo bulapelli hahulu bwa sicaba sani mo ne buinezi, ni ciseho ka za Mulimu. Ni lumela kuli haiba ne lu ka bala batu bene ba li ni ciseho luli, ba kacenu kamba lizazi lani, bona ne bakaba hahulu ni ciseho kufita mo lu bezi. Fahule luli! Foo ha li wela ku za kubuluka lizo ni milao, ni lika zeñwi,

ne bapila ka zona. Mi neba na ni ciseho hahulu ka za Mulimu, mi neba lumela ku Mulimu. Kono Jesu, Mulimu ya ezizwe nama mwahala luna, naize, “Mu Ni lapela mbango.” Cwale, Na si ka bulela kuli neba sa Mu lapeli. Neba Mu lapela, kono neli mwa mbango.

⁴¹ Kacwalo sika kaufela mwa mbango kinto yesina-, ibe cwani ni cwani, kinto yesina tuso. Ha u lukeli kueza cwalo, kakuli usweli fela ku sinya nako ya hao. U sweli fela kusinya moya wa hao, u sweli fela kusinya kuikataza kwa hao, kufitela lu ziba ze lusweli kueza.

⁴² Kaniti, haiba Mulimu ukulubela kuli sicaba si petahale, sina Jesu hana ize, “Mube baba petehile sina Ndata mina mwa Lihlimu hali ya petehile,” ku lukela kuba ni buitukiso kokuñwi. Mi ki Hali, “Ni ka keta sibaka ko sicaba si ka Ni lapela. Hakuna sibaka sesiñwi se Ni ka kopana ni sona.” Mi, cwale, seo si lukela kuba sona sibaka sani, mi lu lukela ku si batisisa. Lu fumane fo si inzi, mi kipeto ni kuya teñi. Ni sepa lu lukela kuapula fateni, kapili, foo ha lu se lufumani sibaka seo, lu si ye fela lika zeñwi kihona.

⁴³ Cwale, muhupule, Jesu naize mwa Liñolo leliswana le lona le Ni bulela. Sizo sa batu kanti si mwa mbango. Ha lu lukeli ku angabazwa ki zona. Kuna ni ze tokwahala, kokuñwi, sibaka sesiñwi seo A lu lukiselize, kuli lutahe mi milapelo ikona amuhelwa. Cwale, muhupule, kwanda sibaka se si ketilwe sani, hakuna taba kamba u ya sepahala cwani mwa milao, u sa lapela mwa mbango.

⁴⁴ Na ziba seo si utwahala kashwau. Kono, muyaho so li bukaufi ni kufela, ha lu lati kuli u nyanganye. Ha lu li u nateleñi hande ni Evangeli, kacwalo kuli fani batu ha ba ku katana mwa nzila, kamba kaufela ko uinzi, u Mukreste, kuli ukaba ni kalabo ya ku ba fa.

⁴⁵ Mwa hola fani ha ba bulela kuli, “Oh, *se* ki Sani. Mi Ni boni *se* ha si eza *se*, ni *sani* ha si eza *sani*.” Kiniti, lika ze kaufela lina ni ku ezahala. Kono kuna ni sibaka se si lukisizwe ki Mulimu anosi, mi sani kona sibaka ko Mulimu akopana ni mulapeli, anosi.

⁴⁶ Mulemuhe timana ya 2, “Mulapele mwa sibaka se Ni ketile.” Kuketa sikamañi? Mwa sibaka se kubonisa kuli Una ni sibaka koo batu kaufela ba lapelela. Libaka zeñwi kaufela li mwa mbango. “Mi mwa sibaka se si swana *se*,” Na ize, “Ni ketile hape kubeya Libizo la Ka mwa sibaka se. Ni ka keta sibaka, mi Ni ka beya Libizo la Ka ku sona, mwa sibaka se mwa ka yo lapelela.”

⁴⁷ Cwale, se si bonisa kuli kuna ni sibaka silisiñwi, ki silisiñwi fela. Ilukela kuba keto ya Mulimu; haikoni kuba ya luna. Haluna keto yetaha; U iketezi kale sona. Cwale, sa keta Mulimu si lukile. Na kona kuketa se si fosahalile, mwakona kuketa ze fosahalile, kono Mulimu hakoni kueza cwalo. Mukete hande. Kasamulaho wa zeo, hanili, Ki Yena ya lapelwa. Mi Una ni sibaka ko Abata

balapeli ba Hae kuli ba kopanele teñi, mi luswanela ku kopana ni Yena ona koo. Sani kona fela sibaka sinosi ko Apila; sibaka fela sinosi ko Aka ku utwa.

⁴⁸ Halu lemuheñi fa, hape, “Sibaka se Ni ketile ku Ni lapela ku sona, Ni ka beya Libizo la Ka mwa sibaka seo.”

⁴⁹ Oh, cwale ha lu bateñi Mañolo ka sibaka seo Ana ni Libizo la Hae ku sona. Cwale luna ni miluti ni mifuta, mwahala Bibele kaufela, lwa ziba cwalo, ka libaka zeshutana kwa kile A kopana ni sicaba, kono sani ha ki sona sibaka ko Aka kopana ni bona kacenu. Kakuli ne li yemela fela nto yeñwi, ye ne taha kwa sibaka tenyene kwa Na ka kopanela ni sicaba, sibaka, Keleke Ya lukela ku kopana ku yona. Mi kuna ni sibaka, kuna ni Keleke, yeo Mulimu na sepisize ku kopana ni sicaba mwa sibaka se ni ku alaba litapelo za bona, haiba neba ka taha fela mwa sibaka se ni ku to Mu lapela.

⁵⁰ Cwale lu fumana kuli kuna ni babañata baba ipapata kuli—kuli bana ni sibaka, Libizo la Mulimu lifumaneha mwa sibaka sa bona. Kono, mwa bona, *ba* beya Libizo la Mulimu mwateni. Kuna ni shutano yetuna mwahala Mulimu ku beya Libizo la Hae mwateni, ni mutu yomuñwi ku libeya mwateni, Libizo la Hae mwateni. Mwabona? Lu swanela kuhupula kuli Mulimu naize, Ni ka beya. “Ni beile Libizo la Ka. Ni ka beya Libizo la Ka mwa sibaka se. Mi sani kona sibaka se Ni ketile, mi ni ketile, kuli sicaba si lapele.”

⁵¹ Se, si lutisa cwale mwa ponahazo ya miluti ye ya nako ye, si lutiseza Krete mwa ponahazo. Testamente ya Kale kaufela ne i monyehela Jesu. Mwa Egepita, busihu bwani fani hane kuna ni kuba ni—ni ngu ya paseka ye ne bulailwe ya silelezo ya sicaba, lu lemuha kuli Mulimu nana ni sibaka silisiñwi, mulao ulimuñwi. Hakuna taba kamba ki mwanana cwani, kamba muprisita ya hulile cwani, mutu wa za bulapeli, kaufela so no li sona, u lukela kuba mwa sibaka sesiñwi se. Kaufela baba kwande a sibaka sani, ne ba yundiswa. Mu lukela kuba mwa sibaka silisiñwi se, sibaka sa Na lukisize.

⁵² Cwale, ne luka ina nako yeñata, musihali wo, ka kutatulula zeo, yekona kuba fela kufituluka ku ze lu ziba kale, ka mo Krete u bonahalile ka mifuta yateni. Ngu ya sitabelo, mo iswanela kubulukiwa, ya poho yesina nyazo, ni mo ilukela ku bulaelwa ki babahulu, ni ka mo mali alukela ku hasezwa fa sikwalo, kaufela ki ze bonisa kutaha kwa Krete. Mi mwatasa mali a suluhile a neli sibaka seo Mulimu na katana mulapeli, fani lingeloi la Lifu ha ne lifita mwa naha.

⁵³ Ni lumela kuli lu itukisize kuzwa mwa Egepita, leliñwi la mazazi aa, ni kukena mwa Naha ya sepiso ye. Mi seli nako ya kuli lukene mwa sibaka se si lukela, ni kutuhela mifilifili ye, “Ni wa Presbyterian. Ni wa Methodist. Ni wa Baptist. Ni wa se. Ni wa *sani* kamba *sesiñwi*.” Muzwe ku zona, mi mufumane ko kuna

ni sibaka se, kakuli kuna ni lifu kai ni kai kwanda sibaka sa Hae se si ketilwe. Lifu li ka nata fela luli sina mo ku bezi lifasi, haiba ha lu yo mwa sibaka sa Hae se si ketilwe. Kono koo A keta, lifu halikoni kutaha.

⁵⁴ Haiba mulemuha mwa ngunyana ya sitabelo, lifu ne se li potezi kale mwateni. Lifu ne litile mwa sibaka se kakuli ngunyana ne se i shwile. Lifu ne se li potile kale. Mi kacwalo kone kuna ni lifu, mi Mulimu a sepisa kuli sani ikaba sibaka sa Hae. Konakuli, Yena ha iponahaza, lu bona cwale seo ngu ya sitabelo neili sona, seo sibaka sa bupilo nesili sona ka nako yani.

⁵⁵ Cwale, ku na, se si feza likañi kaufela. Ni Kreste inza iponahaza, ka kuba Ngunyana ya sitabelo, konakuli seo si felisa likopano kaufela, lituto za litumelo kaufela, lituto za bulapeli kaufela, buino bwa keleke kaufela. Si felisa lika kaufela. Yeo ki niti, kakuli lu fumana cwana, fa, Yena mwa ponahazo, kakuli Yena ki Linzwi leli sika zwakiwa la Mulimu. Muhalalehi Joani 1, naize, “Kwa simuluho nekuna ni Linzwi, Linzwi nali ku Mulimu, mi Linzwi neli Mulimu. Mi Linzwi a ezwa nama mi a to yaha ku luna.” Kabakaleo Yena ki Linzwi la Mulimu le li si ka zwakiwa le li ezizwe nama, le li bonahalile.

⁵⁶ Mi taba ye mwa mwaponahazo, halukoni kutamahanya seo kwa keleke ifi kaufela mwa lifasi kacenu, kopano ifi kaufela. Sibaka kaufela se si cwalo, halukoni ku tamahanya kusona, kakuli ha ku cwalo. Lu beya Libizo la Kreste fa muyaho, lu li biza kuli likeleke za “Kreste,” ni *se, sani*, kamba *sesiñwi*. Sani ha si ezi cwalo. Seo ha si ezi cwalo, ni hanyinyani. Kono fani Mulimu ha beya Libizo la Hae ku sesiñwi, sani kona se si eza lika.

⁵⁷ Cwale, hakuna sika mwa Bible se si kona ku swanisisa likopano za luna za kacenu, kwanda Babilona. Wani kona fela mufuta mwa Bible wa kopano ya luna ya kacenu, bulapeli bwa kuongaonga, kakuli ne li kalisizwe ka Nimrod ni swalisano ya kapelezo mwahala sicaba sa bulapeli. Mi zeo kona lituto za litumelo ni likopano za luna mo li ezeza kacenu, kopano ya kapelezo, “Ukona kuba wa se kamba u kwande!” Mi lwa taha cwale, sina ha lu bona, kwa kapelezo ya mayemo alimañwi amatuna a zona. Kono yeo ki kelezo ya ikupulezi fela mutu mi itahile ka mutu, mi mane haikoni kuyema. Ha ki tato ya Mulimu. Ha ki tukiso ya Mulimu. Hakuna taba kamba batu balika kubulela cwani kuli ku cwalo, ha ku cwalo. Haku konahali kuba cwalo. Ha ku konahali fela, kuli kube cwalo. Mulimu hakoni kubeya Libizo la Hae mwa sika se si cwalo se si latula Linzwi la Hae. Kana Mulimu ukona kupila cwani mwa sika se si latula Linzwi la Hae Tota? Hakoni kueza cwalo.

⁵⁸ Kacwalo lu fumana kuli, ha li swalisani kwa keleke ifi kaufela, Methodist, Baptist, Presbyterian, Pentekota, Katolika,

Orthodox ya Sigerike, kaufela seo sikona kuba sona. Ha ki sibaka sa Mulimu sa kulapelela, haisali.

⁵⁹ Cwale mutuhele Mulimu, Yana file sepiso ye, atahe mi a i bonise, kuli ki niti. Cwalo kona mwa ku ezeza. Haiba Usali yena Mulimu, Usali yena Mulimu! Haiba Akile aba Mulimu, Una ni kusiyala ali Mulimu!

⁶⁰ Mi cwale lubona ona bulapeli bo bu hapelelizwe bo, fapila luna hande cwale, ku to tisa likwata zenyinyani kaufela mwa “buñwi bo butuna,” mo ba li bizeza. Babañwi ba bona balumela ku *se*, mi babañwi balumela ku *sani*; mi babañwi ba latula *se*, mi babañwi ba latula *sani*. Bibebe ibulezi kuli, “Kana bababeli bakona cwani ku zamaya hamoho ha ba sa lumelelani?” Halina ku beleka.

⁶¹ Lu lukela kuba mwa tumelelano. Mi ki mwa tumelelano ni sikamañi? Isiñi mwa tumelelano ni yomuñwi, kuya ka mo lu lukela kubela mwa tumelelano ni Linzwi, ni Mulimu. Sani kona se si lukela kuba mwa tumelelano ni sona.

⁶² Cwale lu fumana kuli, mi sikwata sa kapelezo ne si yemelwa ka likwata za batu kwa Babilona. Mulimu hakoni kubeya Libizo la Hae mwa sika se si cwalo sani. Na si ka eza kale zeo mi Haana ku lieza mane. Nihaike neba likile cwalo, neba beya libizo la bona ku zona, kubeya Libizo la Hae ku zona, kono ha ki cwalo.

⁶³ Kono lu swanela kufumana kwa Na beile Libizo la Hae, kakuli ki sona sibaka mi sibaka fela sinosi ko A lukiselize Bakreste kutaha, ni bana baba lumela, ni ku Mu lapela mwa sibaka se. Kana sibaka se sikaba cwani?

⁶⁴ Cwale ka ku itiisa, lwa kona kunga Bibebe kaufela kutiisa ku se Ni ka bulela. Kakuli, sibaka sa Na ketile si ku Krete, ku Jesu Krete. Si ku Yena, Mwana Hae; Mwana Mulimu, Jesu Krete.

⁶⁵ “Kihande,” u ize, “Ni hupuzi kuli Liñolo li balile fa kuli Na bulezi kuli Uka keta sibaka, mi Na ka beya hape ‘Libizo’ la Hae mwa sibaka sani.”

⁶⁶ Kihande, mwana kamita unganga libizo la ndatahe. Libizo laka ki Branham kakuli bondate neli bo Branham.

⁶⁷ Mi Jesu na bulezi kuli Na tile ka Libizo la Ndata He. Muhalalehi Joani 5:43, “Ni tile Ka Libizo la Ndate mi ha mu Ni amuheli,” kabakaleo kwani kona koo Mulimu na beile Libizo la Hae, mwatasa sitabelo sa Mwana Hae Tota! Sani kona fela sibaka sa lukisize Mulimu. Kwani kona ko batu bakona ku kopana ni Mulimu, ki ku Krete. Sani kona sibaka sa Hae se si lukisizwe. Hakuna kopano, hakuna tuto ya tumelo, hakuna sika sisili fela, ko Mulimu u sepisize ku kopanela. Konji fela ku Jesu kona ko Aka kopanela, kakuli sani kona fela sibaka ko ku fumanaha Libizo la Hae.

⁶⁸ Hape lu utwa Jesu, sina ha Ni latelela Liñolo, Joani, Joani kauhanyo ya 5 ni timana ya 43, Ki hali, “Yomuñwi uka taha,

ni kutaha mwa libizo la hae, mi yena yoo mu ka mu amuhela.” Lwakona kuikopanya kwa tuto ya litumelo, “yeñwi,” lwakona kuikopanya kwa kopano, muka mu amuhela; kono foo ha mu amuhela Jesu, kwa shutana. “Yomuñwi uka taha, ‘Ni ka bulela kuli Ni wa Methodist, Ni wa Baptist, Ni wa Presbyterian,’ mu ka amuhela zeo ku lukile. Kono Ni tile Ka Libizo la Ndate, ni eza sa na bulezi Ndate kuli Ni ka eza, mi ha mu Ni amuheli.” Ki hali, “Joani natile, mi nana ni bupaki bobutuna, kono Na ni paki yetuna ku Mulimu—ku Mulimu kufita za na ezize Joani. Kakuli sa Ni file Ndate kuezwa, kona se Ni eza,” manzwi ana ñozwi ka Yena, sa Na lukela kuba sona mwa lizazi lani. Kakuli Nali cwalo. . .

⁶⁹ Libizo la Hae neli Mulimu. Mulimu una ni malumbatina amañata. *Mulimu* ki lilumbatina, Kasibili, na bizwa Jehovajaire, Jehova-rafa, Jehova-manase. Na bizwa kuli Palisa ya Sharoni, Mutungulu wa mwa Musindi, Naleli ya Kakusasana; Alfa, Omega, Makalelo ni Mafelelezo; konakuli Ndate, Mwana, Moya o Kenile; ona malumbatina aa kaufela.

⁷⁰ Kono Libizo la Hae, Libizo la Mulimu ki “Jesu Krete,” yena Ya Tozizwe. Lani kona Libizo la Hae. Nana ni malumbatina amañata, kono Libizo liliñwi, lona fela, “Hakuna Libizo lilisi mwatasa Lihalimu le lifilwe ku mutu, leo mu lukela kupiliswa ka lona.” Lu fumana kuli yeo ki niti.

⁷¹ Hape ka temuso ye, kuli, “Fani mutu yomuñwi yo ha taha, kuli na tile ka libizo la hae, ‘Methodist, Baptist, Presbyterian, Pentekota,’ ni zeñwi cwalo, mu ka mu amuhela. Mu ka ikopanya ni yena.” Kono Krete u hanilwe. Ba Li hana.

⁷² Mupolofita naize! Ha lu lateleleñi Libizo la Hae hanyinyani. Mupolofita naize, “Libizo la Hae uka bizwa ‘Emanuele.’” Cwale, Isaya na bulezi cwalo, mwendi ki kauhanyo ya 7. Mi hape ni mwa Mateu 1:23, ili, “Ze kaufela ne li ezahalile, ze ne lukela kutalelezwa ki Mulena ka mupolofita, kuli, ‘Libizo la Hae li ka bizwa *Emanuele*, le li tolokwa kuli, “Mulimu una ni luna.””

⁷³ Emanuele, mi Libizo la Hae neli Jesu, Mulimu una ni luna, ni Libizo La Ndatahe. Na tile Ka Libizo la Ndatahe. Mwani kona moo Mulimu na beile Libizo la Hae, ku Mwana Hae. Sani kona fela sibaka sinosi ko mukona ku Mu lapela. Sibaka fela sinosi seo Mulimu aka mi katanyeza, ki ku Mwana yani yana swanisizwe ka ngunyana ya sitabelo. Ni kutaha cwalo mwahala Testamente ya Kale, kaufela zona ne li tisize mifuta ya nto iliñwi yani, kuli sibaka sani sinosi, Mulimu, anosi, na kopanela mwatasa mali a sitabelo; sibaka fela sa Na kopanela teñi. Sibaka fela sinosi ko Akopana kacenu: ha ki ka libizo la tuto ya tumelo, kamba ka libizo la kopano, libizo la keleke, kamba libizo la sikwata, kamba libizo la katengo, kono ka Libizo la “Jesu Krete!”

⁷⁴ Ne ni likile zeo fani hane Ni sa li fela mushimani. Ne ni utwile hañata ka za mioya, ya diabolosi, mwa ezezanga lika. Mi Ne ni

ziba kuli haiba kuna ni Mulimu, ku lukela kuba ni diabulosi, kakuli Bibeke ibulezi kuli kuna ni diabulosi. Mi yena, Na hupula kuli . . . na utwa ka za ba mioya yeo. Ne ni ile ku babañwi ba bona, na yo fumana kuli neli mahata, kusina zeñwi ku bona, neli fela sikwata tuna sa baba sa lumeli. Kono Na fumana kuli nekuna ni babañwi ba bona be ne ba li mwa litaba za moya hahulu.

⁷⁵ Ne nili kwa mafulo nako yeñwi, ko mukutazi ni Na lwaya ku yo ba bona kwani. Neba nanulezi tafule mwa halimu kuzwa fafasi, mi ne ba tomile fateni likomoki za magilasi; ni kunga tafule yani, ku i fetaula kwa mulaho ni kwa pata. Ni gita inze fufa mwahala muyaho; libyana za batu. A inanulela mwahalimu, mwa muzuzu. Ali, yona mioya yani yali, “Ni laela kuli yomuñwi a i wiseze fafasi.”

⁷⁶ Baana bababeli bali, “Ni ka iwiseza fafasi.” Ba i swala kwa mahutu sina *cwana*, ni kulika ku ku i swala. Ne i si ka lumela. Kiñi, tafule yani ya ba wiseza fafasi ku lapalalala fa bulilo.

⁷⁷ Musike mwa ina fela fakaufi. Haiba wali kuba ube mukutazi mi ubile mwa masimu, taba fela yo ziba ki muhupulo wa diabulosi. Haiba mutalima fa lika zeñwi za sicaba se si zamaya mwa mikwakwa, mwakona ku mubona. Kono kuna ni diabulosi! Kaniti u teni.

⁷⁸ Mi batu ba ba lapela diabulosi, mane haba zibi se ba eza. Ba lapela diabulosi mwa likeleke, “Ku luta sicaba Tuto ya litaelo za batu, lituto za litumelo—lituto za litumelo ni lizo.” Mi se Nili . . .

⁷⁹ Musali yo ato ni huweleza, mi ali, “Ba ni bulelezi kuli u mukutazi.”

Se nili, “Ni mukutazi.”

⁸⁰ Musali ali, “Konakuli haiba ha u . . .” Ali, “U nahana sikamañi ka se?”

Se nili, “Ki diabulosi.”

⁸¹ Mi ki hali, “Kihande, konakuli, haiba una ni mata amañata hahulu, kifo i wiseze fafasi.”

⁸² Se nili, “Hanina mata ni amakana, ni hanyinyani. Hanina mata, kono Ni teñi mo ku to yemela Yomuñwi.”

⁸³ Se nili, “Mulena Jesu, U bulezi cwana, ku Muhalalehi Mareka kauhanyo yabu 16, ‘Ka Libizo la Ka ba ka leleka madiabulosi.’” Se nili, “Cwale, kuli mutanga Hao a zibe, sina ndwa haili fapila ka!”

⁸⁴ Se nili, “Ni laela tafule yani kuli iwele fafasi, ka libizo la ‘Keleke ye kenile,’” mi ya ina fela ona fani. Se nili, “Ni laela tafule yani kuli iwele fafasi fani, ka libizo la ‘Ndate, Mwana, ni Moya o Kenile,’” ya ina fela ona fani. Se nili, “Ni laela tafule yani kuli iwele fafasi, ka Libizo la ‘Jesu Krete,’” mi ya bata ku lobeha mautu amane kaufela, ha i to nata fafasi!

⁸⁵ “Ka Libizo la Ka ba ka leleka madiabulosi!” Lani kona Libizo la Ndate. Na beile Libizo la Hae ku Jesu Kreste. Mi ku Yena Wa kopana, ku to lapela. Ku Yena Wa kopana, ku leleka madiabulosi. Ku Yena Wa kopana, ku folisa bakuli. Ku Yena Wa kopana, ku to pilisa. Ku Yena Wa kopana, ku to pilisa, utaza ka Moya o Kenile. Sani kona fela sibaka sa Mulimu kwa ku kopana ni sicaba mwa kulapelela. Cwale lu fumana kuli Jesu naize hape kuli. . . Linzwi, Libizo la *Jesu*, litalusa “Jehova-Mupulusi,” Jehova yena Mupulusi.

⁸⁶ Muhupule, “Hamuna ku lapela Mulena. . .” ⁵, timana ya 5, “Hamuna ku lapela Mulena mwa minzi ifi kaufela, yeo Mulena Mulimu aku fa. Mwa minzi ifi kaufela, hamuna ku Mu lapela kuyona,” Mulimu na bulezi cwalo, mwa timana ya 5 mo, ya Deuteronomo 16. “Usike wa Mu lapela mwa minzi ifi kaufela, yeo Mulena Mulimu aku fa. U ku fa lika ze ka miliko.” Lu ka kena ku zeo, biki ye, haiba Mulena alata, mubone haiba Mulimu u kutisa Linzwi la Hae mwa mulaho, kamba nee. Mulemuhe, Na mi file minzi yani, kono musike mwa lapela Mulena ku ifi kaufela ya minzi yeo, kakuli Mulena Mulimu wa hao haana ku ku katanyeza ku yona.

⁸⁷ Kono Mulena Mulimu u iketezi munyako. U iketezi sikwalo. Jesu naize, ku Muhalalehi Joani kauhanyo yabu 10 kuli, “Kina munyako kwa mulaka wa lingu. Ki na munyako woo.” Ki yena Jehova-Mupulusi.

⁸⁸ Cwale lwakona kuzwelapili fa liholo nyana, kutatulula zeo. Kono Na sepa mwa utwisisa, ka kezo ya mina, kuli mu—mu alaba kwa Niti ni kwa Linzwi. Kacwalo haluna kuzwelapili fahule, mwa ku linga kaufela ko mu lata. Kai ni kai ko mutaha, haiba ki Niti, ika kutela hape mwa sikuka hande ni Linzwi kaufela. Hamukoni kueza kuli Bibe le i bulele nto iliñwi, mi ni nto isili fela, kinto yeshutana ku sa Na bulezi pili. Lina ni kuba ze swana ka nako kaufela.

⁸⁹ Ni sweli kufitelela Mañolo amañata fa taba ye, bakeñisa fela kuli Ni bona kuli seli busihu. Mi kezela luna ni babañwi bana ni sebelezo kwanu busihu boo, mi lu bata ku lapelela bakuli. Fo kikuli, ni kuziba kuli, Billy, haiba bana ni makadi a litapelo.

⁹⁰ [Yomuñwi uli, “Hakuna sebelezo busihu boo.”—Mu.] Hakuna sebelezo. Kihande. Kihande, kihande. Ku lukile. Cwale ha lu li batisiseñi. Ku lukile. Ku lukile. [Kopano ya kambela.] Lu sepa kuli Mulena uka fuyola kalibe yo ka se, ku lu lumeleza kuba ni sibaka se, ku lufa nako ye.

⁹¹ Kuna ni bupaki bo bu ñata hahulu ka buipiteli bwa kuli Jesu kona sibaka. Ki yena munyako, Ki yena Libizo, mi nzila inosi fela ye lukisizwe yeo Mulimu ana ni ku kopana ni mutu kuyona mwa milapelo. Ki yena Nzila, ki Niti, ki Bupilo; ki Munyako, ki Sikwalo; ki Alfa, Omega, wa Makalelo ni Mafelelezo; Palisa ya Sharoni, Mutungulu wa mwa Musindi, ki Naleli ya Kakusasana;

ki Alfa, Omega. Yena ki lika kamukana, taba kaufela kubeiwa hamoho. Ki yena sibeli cwalo Mubisi ni Mwana wa Davida, yena Naleli ye Benya ya Kakusasana. Ku Yena kuna ni mutalelela wa toho ya Bumulimu, ka mubili, mo luna mwani lu bana ba bashimani ni basizana ku Mulimu, mwa toho ya Bumulimu bwa Mulimu. Eeni. Sina bana ba bashimani ni basizana, lu mwa lubasi, haiba muteni mwani.

⁹² Cwale lu kena cwani mwa sibaka sesituna se ku to lapela? Yeo kona puze yetatama. Lu kena cwani mwa sibaka se, haiba Jesu kona sibaka? Ki yena Libizo la Mulimu. Ki yena sibaka sa kulapelela sa Mulimu. Mi ki Yena fela sikwalo kwa ngu. Mi lubata kufumana mo lu kenela ku Yena kanti.

⁹³ Cwale, haiba ukeni mwa munyako, eeni sha, ukena sina lubasi, sina hane lu ambola zazi leliñwi, ki...kamba kwa mukushuko, ka za lingu ze nyinyani, kuli Mulimu nasike ku kwala sikwalo kufitela A fumana ngu nyana ya mafelelezo yani ni ku to ikenya mwahali. Haiba mukeni mwahali, kipeto mufetuha kuba lubasi. Mu lubasi lwa Mulimu foo ha se mutile ku Mulimu. Kono hamukoni kuba lubasi lwa Mulimu ni kuba ba Presbyterian, Methodist, Baptist, ni Mapentekota. Hamukoni kueza cwalo. Mu lukela kutaha ku Jesu Krete.

⁹⁴ “Kihande,” mu li, “lu ezize.” Lu ka bona haiba mu ezize cwalo.

⁹⁵ Ha lu fumaneñi se ibulela Bibeles cwale. Lu fumana, mwa Makorinte Bapili, kauhanyo ya 12, Bibeles ibulezi kuli, “Ka Moya ulimuñwi luna kaufela lu kolobelizwe mwa Mubili ulimuñwi.” Lu kolobelizwe mwa Mubili wa Krete, ka Moya o Kenile ulimuñwi. Ha lu si ka kena ka ku lu nyanganyiswa, ha lu si ka ikopanya mwateni, ha lu si ka kena ka ku lu kolobeza ka mezi. Lu kolobelizwe ka Moya o Kenile, kukena mwa Mubili wa Jesu Krete.

⁹⁶ Ku nga nako yekuma kai fani ha u keni Mwatani? Kufitela u palelwa ku ikuteka? Maefese 4:30 ize, “Musike mwa halifisa Moya o Kenile wa Mulimu, o mu swailwe ka ona kuisa lizazi la ku liululwa kwa mina.” Mu kanane ni Yena, ha ki na. Sani kona se I bulela. Na ni Li bala fela. Ku lukile. “U swailwe kuisa lizazi la kuliululwa kwa hao,” kufitela lizazi leo Jesu a kutahela.

⁹⁷ Konakuli, munahane fateni, ha u yo unosi kanti, u sibupiwa sesinca, kamba Sigerike foo sitalusa kuli “pupo yenca.” U bupilwe sinca hape. Mata a Mulimu ataha ku wena, mi uba ya bupilwe, ili sibupiwa sesinca; zetisa pupo ya nama kaufela, pupo ya moya ni zeñwi kaufela, mwa kuipeta ku utwa Linzwi la Mulimu. Isi ka mukwa usili fela!

⁹⁸ Kana ukona kubulela cwani kuli u Mukreste, ni ku sa utwela Linzwi la Hae mwa nto iliñwi? Kaufela ya na hanyeza mulao mwa—mwa kalulo iliñwi ya Ona, nana ni mulatu wa Ona kaufela. Yo kaufela! Jesu naize, “Mutu hana kupila ka buhobe fela, kono

ka Linzwi kaufela le li zwelela mwa mulomo wa Mulimu.” Isiñi fela siemba sa Manzwi; Linzwi kaufela! Zeo Na li bulezi mwa Sinulo kauhanyo ya 22, “Yo kaufela ya ka zwisa Linzwi li liliñwi mwa Buka ye, kamba ku ekeza linzwi ku Yona, siemba sa—sa hae si ka zusiwa mwa Buka ya Bupilo.” Ha lu lukeli kuzusa sika mwa Bibe, kamba ku ekeza ku Yona. Ki ku bulela fela se I bulela.

⁹⁹ Mi mwa Makorinte Bapili 12, I bulezi kuli, “Ka Moya ulimuñwi luna kaufela lu kolobelizwe mwa Mubili ulimuñwi.”

¹⁰⁰ Cwale kasamulaho mumana kuba mwa Mubili woo, Maroma 8:1 ili, “Cwale hakusana katulo ku babali ku Krete Jesu, baba sa zamayi ka nama, kono ka Moya.” Seo kona sibaka mo kusina katulo. Kamba u ya kwa Methodist, Baptist, keleke ya Presbyterian, kaufela ko ifumaneha; haiba u ku Krete, u sibupiwa sesinca, mi hakuna katulo ku wena, hakuna nihaiba iliñwi haiyo. Sani kona sibaka sa ku kopanela sa Mulimu. Kwani kona koo Mulimu akopana ni mulapeli. Kwani kona ko u yo balelwa u sibupiwa sesinca, kakuli ba shwile kwa lika za lifasi. Ba pila ku Yena. Kubateni koku pila kwa Mulimu ku ina ni bona, zazi ni zazi.

¹⁰¹ Upila ku bona, mwahala lusika lufi ni lufi kaufela. Lusika kaufela lo lutahile, kuya ka kushetumuka mwa Bibe, fani mutu ha fita fa linepo za Mulimu, utaha mwa sibaka ko A lukisize Linzwi la Hae leliñozwi la lizazi lani, Mulimu ueza kuli mutu yo abe sibupiwa sesinca, mi haana katulo. Mutalime Jobo.

¹⁰² Kana Na mi tiba mazebe, mo Ni inezi mwa ma maiki aa? Mu ni swalele ka zona. Ni ziba kuli ki ku utwahala kwa lilata kwanu. Na li utwa kwanu, nina.

¹⁰³ Kono, mutalime. Jobo, hakuna taba kamba neli batu babañata cwani be ne balika ku mu nyaza, neli babakai bene ba bulezi kuli na fosize, na buluka litaelo za Mulimu, ka sitabelo sa ku cisa sani. Na ziba kuli na beilwe ya lukile, kakuli na buluka litaelo za Mulimu. Cwalo kona mwa na beezwi ya lukile, kakuli nasweli kuezwa lika za na bata Mulimu kuli aeze.

¹⁰⁴ Ki Kubateni ko kupila kwa Mulimu ku monyeha musihali kaufela, zazi ni zazi, kuzwa kwa lifu la lituto za litumelo, ni kwa Bupilo ni kwa Linzwi la lizazi lateni. Cwale, Mulimu una ni lika Za eza.

¹⁰⁵ Sina palisa ye—ye nyinyani, sina hane Ni bulezi kakusasana omuñwi kwa mukushuko. Fani kuli peu ha itaha kwa liseli, ikala kuhula. I nwa kwa sibuba sa Mulimu, izwelapili kukasha kufitela i taha fa siemba sa kutubula, a kena mwa palisa, kupahama mwa kushoshela kwa yona.

¹⁰⁶ Cwale lu fumana cwana, kuli fani ha lu kala ni Krete, lu hula ka nzila yeswana, kakuli lu hulela mwa sishemo ni mwa sabo ya Mulimu.

107 Mulelo fela wa Mulimu o lukisizwe, kwa lusika lufi kaufela, ki Linzwi la Hae. Mwana Hae ataha ku to bonahalisa sepiso kaufela yene sepisizwe mwa lusika lwa Hae. Bapolofita kaufela ne ba tile fela ka nako yeswana, nebali Linzwi la Mulimu le ne li pila mwa lifasi. Nebali Linzwi. Jesu na bulezi kuli nebali “balimu.” Jesu na bizize bapolofita bani kuli, “balimu.”

108 Muuna yomuñwi na ni katani mwa mukopano wa mafelelezo wo ne Ni nani, ki hali, “Wena u munituti wa za bulapeli ya shebile.”

109 Mi se Nili, “Ha ni ipapati kuba alimuñwi.” Se nili, “Linzwi ha li tahangi ku munituti wa za bulapeli; lituto za bulapeli kona ze tahanga kulona.” Linzwi la taha . . . Mwabona? Se nili, “Lituto za bulapeli fela kona ze tahanga ku munituti wa za bulapeli. Kono,” Se nili, “lu bulela fa nto isili fela.”

110 Cwale lufumana kuli, mwa lusika lufi ni lufi, fani Mulimu ha na bulezi kuli taba yeñwi ika ezahala, ki yo mutu yomuñwi ataha mi a to bonahalisa ona cwalo, fa kwa taha sicaba mi nesi ti lo pila ona cwalo. Yani neli Mulimu yena Kasibili yana pila mwa sicaba, kakuli neli alaba Linzwi la Hae.

111 Cwale, nzila ya Mulimu fela ye lukisizwe mi ki mulelo fela wo lukisizwe, kacenu, ki yena Mwana Hae, kuya ka Linzwi la Hae la lusika lo, le li filwe mata a pilisa ka Moya wa Bupilo bwa Hae, ku fiwa mata a pilisa.

112 Cwale luna ni likolo zetuna za lituto za bulapeli. Mi linako zeñata ha lu eza cwalo. . . Hakuna ze lu nyaza ka zona, batili kutokwa. Kono, mwa bona, foo ha una ni sikolo sa lituto za bulapeli. . .

113 Jesu naize, ku Muñoli Joani 4, “Nako ya taha, mi cwale se i fitile, foo Mulimu, kakuba Moya, uka lapelwa mwa Moya ni mwa Niti.” Cwale batu babañwi bana ni Moya, habana Niti. Babañwi bana ni Niti, habana Moya.

114 Kacwalo kuswana fela inge hane lu kaba ni mota yetuna, mi lu ya kokuñwi mwa Cadillac. Mi sibeli sa ma Cadillac na pangilwe fela ka kuswana, mi lwa a kasheza kwande kwanu mi lwa . . . kwa mingomo, mi bubeli bwa zona lwa li taza ka mafula. Mi mwa liza ni kuliza iliñwi. Kihande, mu talima fande, ni kubulela kuli, “Sipula si iketile. Mukoboco ki omunde, una ni litamiso za daimondi. Mi ya benya, ki yende. Oh, a ku ikinele fela mi u lobale.” Mi, oh, lika zeñata zemukona kuezwa, ku yeñwi ni yeñwi, kono, mwa bona, iliñwi ya zona. . . Kaufela zona lina ni libelekiso ze lukile, kono iliñwi ya zona kona ye na ni mata. Mwa bona, mwa kona kuziba libelekiso, kono si lwala mata kuli lisipi li tuke, kuli likalise ku sebeza.

115 Mi boo kona butata bo buli ni keleke kacenu. Lu tezi fela lituto za bulapeli, kusina mata ku zona. Yeo ki niti. Mwabona?

116 Ka manzwi amañwi, u lukela kuba ni mulilo kuli utukise mafula, kamba ku si cwalo mafula ana tuso mane. . . Mane haana tuso aswana sina mezi, haibile fela haana mulilo aku atukisa. Kacwalo, kona mo kuinezi cwalo.

117 Hakuna taba kamba lu lutilwe cwani hande, mo lu ka lumelela hande, ni buñata bwa mo lu ka bulelela kuli ki niti, mi lu lumela kuli ki ya niti kaufela, ina ni kuba mata—mata alukela kuba teñi, kuli atuke mulilo, kuli Linzwi lani li tumbuke mulilo, kuli ikale ku pikuluha. I lukela kuba ni zeo. Haiba u sa ezi cwalo, keleke i ka ina i kuzize, mota ika yema ikuzize, ni wena uka ina u kuzize. Kono hakuna taba kamba ubulela cwani kuli, “Na utwa makeke. Na lumela Linzwi kaufela la Yona.” U lukela kuba ni sa ku cakulisa sani, kuli mushini wani wa wani handeleti u kone kulila, mi ni Keleke yetuna ya Mulimu ika zwelapili ku zamaya. Ina ni kuba ni mata ni libelekiso. Hakuna se si fosahalile mwa libelekiso, kono kutokwile mata.

118 Mi Ni sepa kuli bwani kona butata bo buli ni keleke kacenu, lu tokwile mata a matuna ani, a ku itusisa Linzwi le ni ku Li eza kuba le li pila mwa lizazi le.

119 Martin Luther nana ni libelekiso ni mata, a lizazi la hae. John Wesley nana ni zona, mwa lizazi la hae. Mapentekota neba na ni zona, mwa lizazi la bona.

120 Ku cwani he ka lizazi la luna? Ye ki nako isili! Keleke ilukela kuba ye se hulile cwale, itukise ku yo katanyeza Krete, ka ponahazo ya mbuyoti kaufela ya Na sepisize mwa Bibele, inza beleka mwa Mubili ulimuñwi omutuna wani koo Na sepisize kuli Uka kopana ni sicaba mi a lapelwe, mwa Keleke yetuna ye ya Hae.

121 Kono, mwa bona, lu luma bana ba luna kwa sikolo, lu ituta kubala, kuñola, lipalo, litaba za kale kaufela za bapolofita ni lika kaufela. Zeo li lukile, kono kwanda kuli mube ni sesiñwi mwa mulaho wa seo!

122 “Oh,” mu li, “kihande, Ni—Ni huwile. Ni bulezi ka malimi.” Zeo ki zende. Na lumela cwalo, nina. Kono zeo ha ki zona ze Ni ambola fateni niteni. Mwabona, muka—muka. . . ika hasaka. U li, “Plank-plank, boomp-boomp,” inge mota ya kale yelika kulila haikala. Mu li, “Eehe, Na lumela se. Na lumela *sani*, nina. Kono, kono foo ha li taha ku se, mazazi ani, oh, batili. Batili!”

123 Ina ni buhali bo bulikana mwanda kwa lubilo, muzwale, ni genereta yeswanela kwa mulaho wa yona, i ka tukisa Linzwi la Mulimu kaufela kwa sepišo ya Lona. Yeo ki niti.

124 Bwani kona butata bobuli ni luna kacenu, lu batile kutaha fa kuyema. Lu bata kulumela se, kulumela *sani*.

125 Ni bulela nto yeñwi, ka Se. “Kihande, Ha ni zibi.” Kihande, Bibele ibulezi ona cwalo! Ao kona mafelelezo. Haiba Mulimu na bulezi cwalo, si lukela ku ezahala. Haiba luna. . . Haiba sani

kona sa bulezi Mulimu kuli lu eze, lu lukela kueza ona cwalo. Ina fela ona foo kufitela Mulimu atukisa ka mulilo, mi kapili ukala kumata hape, mwa bona. Hausa ezi cwalo, uka tunyisa ma pulagi kaufela. Mi kacwalo lu tokwa nto ye shutana, lutokwa sika se si ka lu tumbula mulilo.

¹²⁶ Kipeto mulemuhe, isiñi fela kuli U taha mwateni ka Moya o Kenile, ka kuituta kwa Linzwi la Hae, U bonahalisa Linzwi lani. Cwale muhupule, bapolofita ba lumela Linzwi. Ba amuhela Linzwi la Mulimu. Mi Mulimu Moya o Kenile wa taha ku bona ni ku to sulula sepiso yani, mi a to i taleleza. Oh, mawi! Ki mañi ya ka nyaza sani?

¹²⁷ Jesu naize, “Ki mañi ya kona ku Ni nyaza ka sibi? *Sibi* ki ‘kusalumela.’ Kaufela sa na ñozi Mulimu ni se ne ba bulezi bapolofita, Kina Kalabo. Se ne ba bulezi Ni ka eza, Na si eza.” Natile sina mupolofita, yena Mwana mutu. Sani kona sa Nali sona luli, ni sa Na pakile kuba sona. Nali cwalo. Kiñi? Mata naliteni fani kuli a cise libelekiso. Nali yena libelekiso, Mwana Kasibili, mi Ndate nali yena mata. “Ha ki Na ya eza misebezi, ki Ndate Ya pila ku Na. U ka hasaka cwalo kwa—kwa—kwa mata ani ni kueza kuli lika zani li zwelepili cwalo. Yena wa li petahalisa.”

¹²⁸ “Ki lili fo Ni kile na bulelela sika. . .” Sina Samuele hana bulezi nako yeñwi kwa sicaba, “Kana Ni kile na mi bulelela sika kaufela, ka Libizo la Mulena, kono kwanda se si ezahalile?” Mwabona? “Ki lili fo ne Ni bulelezi, mi ki lili fo hane si sika ezahala?”

¹²⁹ “Oh, wena, so lu bulelezi si ezahalile, kono niteñi lu sa bata mulena kupale kumane.”

¹³⁰ Cwalo kona mo ku inezi kacenu. Batu babata ku swalelela kwa mihupulo ya bona ye nyinyani. Ba bata kuswalelela kwa lituto za litumelo za bona. Ba bata kuswalelela ku se. Kipeto kubulela ka za ancafazo mwa lizazi la luna, lukona kuba cwani ni ancafazo foo lika inge li sinyehile cwana? Mafula a mota a kopanyizwe ni zeñwi kaufela mwateni, mifuta ya milola kaufela ni lika za kacenu zekopanyizwe mwateni.

¹³¹ Ne ni taha mwa mukwakwa zazi leliñwi, mi ne ku bulezwi, mufuta omuñwi wa mulola wa kacenu, bali, “Ha u lukeli kutapisa mikeke, nto fela yo na ni kueza ki ku i cimbeke ni ku i ombola.”

¹³² Na hupula kuli, “Ni ka ba ikandulwa mwa ndu yaka.” Ni ka ya ni yo itekela ka kwakwati ka mulola woo.

¹³³ Mi se Nili ku musala ka, “Zwelapili cwalo ikele, mulatiwa, tuhela ni tapise mikeke.”

¹³⁴ Na hupula kuli, “Mushimani, micaha bani ba ziba se ba bulela, ona ba sayansi bani. Ni ka mu bonisa musali mwa ku ezeza. Ni ka, musali uka. . . kufitela musali a lemuha fela se, ze

Ni sweli kueza. Ki kuicimbeka fela mwateni ni ku i zwisa, kona fela za kueza.”

¹³⁵ Banana ne ba cile mai kwa mukushuko. Mi se Ni sela mulola wo mwateni, ni ku i cimbeka, ni ku i cimbula, ni ku i cimbeka ni ku i cimbula. Ne ku sana ni mai. Eeni, mañaka. Hani lumeli sika kaufela se Ni utwa fa mazimumwangala, ni hanyinyani. Batili, muñaka. Batili, batili. Batili, luli.

¹³⁶ Ki kabakaleo ha Ni sa lumeli mulao kaufela wa ipangezi mutu kuli ukone kuyema. Mulimu una ni nzila iliñwi ye lukisizwe. Ha ki ba Methodist, Baptist, Presbyterian; kono ki Jesu Krete, ka Kupepwa sinca, inza lumela Bibebe yani. Yani kona nzila ye lukisizwe ki Mulimu, mi nzila fela inosi Ya ezize ka yona, ki ku Jesu Krete, Mwana Hae. Mi, ku Mwana Hae, A beya Libizo la Hae. La Hae, Libizo la Mulimu ki Jesu, 'kakuli Na tile Ka Libizo la Ndatahe. Mi kacwalo leo ki Libizo la Mulimu, kakuli Na li Mulimu.

¹³⁷ Cwale mulemuhe, ona mata amatuna a Mulimu a taha ku mwana mushimani wa Mulimu, a mu fa mata a pilisa, ona Moya wa Bupilo u kena ku yena. Konakuli a eza sikamañi? A ba inisa mwa libaka za Mahalimu, ona fa cwale. Isiñi kuli “bakaba cwalo.” Lu cwalo ona fa cwale. Cwale lu se lu zuhile kale, mata ni libelekiso li keni mwa musebezi, ku lu fa mata a pilisa, mi lu filwe mata a pilisa Fapila Mulimu, ko kuna ni Moya wa Hae. Mi cwale lu inzi hamoho mwa libaka za Mahalimu, ku Krete Jesu; ku Krete Jesu, lu inzi fani, sipula sesituna sani sa . . . se si tukisizwe kale ki mulilo, lu zusizwe kwa bafu. Lu siemba sa yona. Haiba u siemba sa Munyaliwa, u cwalo, kakuli Munyaliwa ki siemba sa Munyali, mwa ziba. Kacwalo lu fumana kuli ki nto yeswana, mi Uka eza ona cwalo fela ze bulezwi ku Yena kuli aeze mwa lizazi le. Haana kuba wa Laodesia, isiñi ka mukwa kaufela wa kufutumala fela. Kono Ukaba fa mulilo wa Mulimu, Uka zamaya mwa Moya wa Mulimu.

¹³⁸ Cwale lu talimela fa cwale kuli lu batisise. Cwale halu, cwale ka yona nako yeswana ye mo i ezeza, kuli se si lu tahela; mi, foo, lu shwile hañwi kwa sibi ni bumaswe, milatu, nitaluse, Yena . . . lu filwe mata a pilisa kwa Linzwi la Hae la lusika lo.

¹³⁹ Cwale ha lu nahaneñi ka kukuta mwa linako za kwa mulaho, ka mutu ya na filwe mata a pilisa ka Linzwi le; lu si kaba kale ni sebelezo ya litapelo za bakuli. Ha lungeni batu babanyinyani, mutalime mikwa ya bona.

¹⁴⁰ Halungeni muuna fa yana bulukile Linzwi la Mulimu kaufela, kwa mulaho mwa Testamente ya Kale, wa libizo la Enoke. Na filwe mata a pilisa hahulu ka Linzwi la Mulimu, kuli nana ni bupaki, kuli, “Na tabisize Mulimu.” Nekusina nihaiba nto iliñwi yeo Mulimu na laezi Enoke kuli aeze kono kaufela ki za na ezize.

¹⁴¹ Ha ni zibi kuli ku kona kuba bo Enoke babakai mo musihali cwana, kuli, haiba mu ziba kuli zeo li mwa Linzwi la Mulimu? Ki babakai ba mina basali baba kutile milili ba ba kona kuipiza kuli bo Enoke, mwabona, mwabona, mi inge muziba kuli Mulimu wa nyaza zeo? Ki babakai ba mina baana, baba tuhelela basali bani kueza cwalo, baba kona kuipiza bo Enoke? Oh, mawi! Yeo ki nto iliñwi fela, kucwani he ka likitikiti? Mi lwa fipelisa babañwi, luli, “Ni wa siemba se, mi Ni wa siemba *sani*.” Mane wakona kuba wa siemba sani, kono. . . kufitela ukena mwa sibaka sa lukisize Mulimu! Mi ha ukoni kukena mwateni konji haiba u ba siemba sa Linzwi lani. Mi, kakuba siemba sa Lona, mube kaufela Lona, muipeya kutwela lika kamukana. Mulemuhe, luna ni se fa seo Bibebe i biza kuli “Linzwi la Mulimu,” mi, ili, mane ki Linzwi la Mulimu.

¹⁴² Cwale lu fumana kuli Enoke natile mwa nzila ya lukisize Mulimu, ka Linzwi la Hae, ni ku zamaya lilimo ze mianda iketalizoho, mi a Mu tabisa. Mi lu fumana kuli libelekiso ne li petehile hahulu ku yena, kuli fani mata ha kala kubeleka mwa mushini, A mu nanula fela kuzwa fa lifasi. Na ngile fela musipili wa pili wa fulai, cwalo, kuliba kwa Lihalimu. Inza belekela fa libelekiso za Mulimu ni mata, hamoho, “na si cwalo,” kakuli Mulimu na mu ngile kuzwa mwa lifasi, kusina lifu. Yeo luli ki niti. Na sweli kuzamaya ka nzila ye lukisizwe ki Mulimu.

¹⁴³ Ki nto yeswana ye lu fumana ku Elia. Elia wa kale na halifezi bo Jezabele babañata hahulu bani bene ba ipentaka kwa lifateho, ni kukuta milili ya bona, ni zeñwi cwalo, ze neba itusisa mwa lizazi lani, muuna muhulu na sa pilile ka kulwanisa fela sibi mwahala basali bani, kakuli nebana ni musali, Jezabele, kwani ya na lukela kubonisa mutala.

¹⁴⁴ Kuswana fela sina Hollywood ya mina mo, mi muna ni likaizeli kaufela mwahala zona kwande kwani. Mi, Jezabele u sa pila, mwakona fela kotalima kwa ni kwa mi mwakona kubona kuli wa pila. Mi usali mwa mata amatuna, ni yena.

¹⁴⁵ Cwale lu fumana kuli, muuna muhulu neli mupolofita, na kutile nto yani ni lika kaufela, na pilile ka kupetahala mwa tato ya Mulimu. Fani bakutazi babañwi kaufela hane ba fokola, yena a pila ona kwani ni Lona.

¹⁴⁶ Mi zazi leliñwi a katala hahulu, kuli, Mulimu aluma koloi kuzwa kwa Lihalimu, ni lipizi za mulilo, mi ya mu pamula. Na tezi hahulu mata afa bupilo ani! Munahane fela, ka Linzwi la Mulimu mwa pilu ya hae, na tezi hahulu mata afa bupilo ani ana mu file mata a pilisa!

¹⁴⁷ “Haiba Moya wa Mulimu, Yena. . .” Ni sepa kuli lu ifumana mwa Maroma, 11, kamba, 1:11, “Haiba,” ibulela kuli, “Haiba Moya. . .” Kamba, Maroma 8:11, ku yona, “Haiba Moya ono zusize Jesu kwa bafu uba ku mina, Uka fa mata a pilisa kwa mibili ya mina ye shwa. Haiba Moya ono zusize Jesu kwa bafu,

haiba—haiba Uba ku mina, Uka fa mata a pilisa kwa mibili ya mina ye shwa.”

¹⁴⁸ Kufa mata a pilisa! Kana linzwi *kufa mata* li talusa sikamañi? Linzwi la Sigerike litalusa kuli, “ku tiswa kwa bupilo kasamulaho wa lifu.” Haleluya. Woo kona munyako wa milapelo. Kulapela mwa Moya ni mwa Niti, libelekiso ni mata, hamoho. Mwabona se Ni talusa?

¹⁴⁹ “Haiba Moya ono zusize Jesu kwa bafu uina ku mina, Uka fa mata a pilisa, ku pilisa, mibili ya mina ye shwa, kakuli Seli Bupilo kale.” Mi fani ha U taha mwa mubili wa hao, U tisa mubili wa hao kaufela mwa ku utwela ona Seo. Ku ipeya ku utwela sikamañi? Linzwi la Mulimu. “Haiba li ku wena.”

¹⁵⁰ Cwale haiba ki nto yeñwi ku wena, ye ku bulelela, “Kihande, ani neli mazazi a kale. Mi Mareka 16 ha ki ya niti, ni mulelo wa Pentekota wa kolobezo ya Moya o Kenile.” Wani ha ki Moya wa Mulimu ku wena. Hanina taba kamba ulutilwe cwani hande, wena, wo ha ki Moya wa Mulimu. Mu li, “Kihande, boma neli ba siemba se, mi bondate, mwahala myaha, ni muzwale waka.” Kaufela zo bata kubulela kuama bahabo wena, ni zeñwi cwalo, zeo ne li kaba zende ka bona; kono ha ki za hao, mwabona, u lukela kutaha mwa lizazi le ku Krete Jesu, kwa lusika lo ni sepišo ye filwe kwa lusika loo.

¹⁵¹ Mulemuhe, lu fumana kuli ona mata amatuna afa bupilo ani na natile Enoke, a mufa mata a pilisa kuli mane aya kwa Hae kusina kushwa.

¹⁵² A to nata Elia, a mufa mata a pilisa kuli mane aya kwa Hae kusina kushwa.

¹⁵³ Lu fumana kuli muyoli wa hae neli Elisha, ili mufuta wa Krete ni Keleke, Elisha. Elia na ezize limakazo zene, mi Elisha na ezize limakazo ze ketalizoho ka zetaalu. Nana ni kabelo yeswana habeli, inge ye ne suluhezi fa Keleke. [Hakuna manzwi fa tepu—Mu.] Kasamulaho bamano ba ni muuna ya shwile, ba mu nepela kwa masapo a hae, mi ataha kwa bupilo. Ona mata afa bupilo ani nali mwa libita ni yena. Hamukoni ku . . .

¹⁵⁴ Ona ateni mwani kamita, foo ha uba ni ona mata atisa kwa bupilo ani a Mulimu, ka kufiwa mata a pilisa ni Yena cwale.

¹⁵⁵ Cwale muhupule, ku Krete, lu nama ya nama ya Hae, lisapo la masapo a Hae. Fani Mulimu ha na holofalize Krete fa Kalvari, Na holofalezi na ni wena. Lu nama ya nama ya Hae, ni lisapo la lisapo la Hae, mubili wa mubili wa Hae, Libizo la Libizo la Hae, Munyaliwa wa Hae. Mwabona, lu inzi ku Yena, lu nama ya Hae ni masapo a Hae.

¹⁵⁶ Mi Mulimu u lu zusize kale, ka manzwi amañwi. Ona mata atisa kwa bupilo ana lu zusize kuzwa kwa bupilo bwa sibi bwani, ni ku cinca butu bwa luna, a lu zusize kale mane ku Krete Jesu, ili, zuho i ka lu tisa mwa kuhula ko ku petehile.

¹⁵⁷ Cwale muhupule, ne lu shwezi ka libizo la luna, ne lu pumbekilwe, ni kuzuha ku Yena. Mwabona, ha lu sali luna bañi ni hanyinyani. Ili mane, lona Libizo lelituna lani la “Jesu Kreste” leo Bibe le ibulezi mo mwa Maefese 1:21, kuli, “Sibeli sa mabasi, mwa Lihali mu ni mwa lifasi, a biziswa ka Libizo lani.” Fani kona fana beile Mulimu Libizo la Hae. Lani kona Libizo la lubasi mwa Lihali mu. Lani kona Libizo la lubasi fa lifasi.

¹⁵⁸ Mi lu ku Jesu Kreste, ka kolobezo ya moya, isiñi ka mezi; ka Moya, lu kolobelizwe mwa Mubili ulimuñwi, ili yena Kreste, sibaka sa ku lapelela. Konakuli, ka kuba mwani, lu ba fa sibaka se, kuswana sina pampili ye yemala muña sika.

¹⁵⁹ U li, “Ni lekile siemba sa mubu.” Ha ki sa hao kono konji ha u na ni pampili ya bupaki. Kono haiba una ni pampili ya bupaki, i bonisa kuli lika kaufela ze lwanisa sibaka seo li zusizwe kwateni.

¹⁶⁰ Mi konakuli foo hause ubile Mukreste ni kuamuhela Kreste kuba Mupulusi wa hao, kipeto, foo Mulimu u luma pampili ya bupaki, si bonisa kuli hakuna taba kamba bo ndataho ne ba ezize sikamañi, bo maho ne ba ezize sikamañi, sa ezize mutu ufi kaufela; bo maho, bo ndataho mwendi nebali macakolwa, mahule; kaufela seo nebali sona, sibi kaufela si takuzwi! Una ni pampili ya bupaki. Hakuna se si kona ku ku zusa ku yona. Mi, talima, lika kaufela zeli mwa mubu wani ki za hao! Amen. Mi fani hamuli ku Kreste Jesu, ka kolobezo ya Moya o Kenile, mpo kaufela ya Mulimu ki ya Keleke. Amen. Ki pampili ya bupaki. Wena, ki ya hao, ki ya hao. Si fa mata a pilisa kwa mibili ya mina ye shwa. Oh, mawi, kambe ne luka nahana ka zona!

¹⁶¹ Ha lu talimeñi ku bani baba sepahala kwa Pentekota. Nebali mwa ndu ya fa halimu fani, mi kaufela bona ne ba sabile. Nebana ni, nebana ni—ni pampili ya bupaki, ku lukile, kono neba sabile. “Mi ona fani fela kwa taha mulumo wo zwa kwa Lihali mu,” pampili ya bupaki ne lumilwe ku bona, “inge moya wa liñungwa, wa tala ndu kaufela mo ne bainzi.” Mi neba tezi mata a pilisa ka Ona, kufitela mane bupye ha bwa bona kaufela neba bali bona. . . Alimuñwi wa bona na sabile, kuli mane a latula kuli ne si Mufarisi haisali, kamba ne si Musaduki haisali. Kono foo Moya o Kenile wani ha u to mu kolobezwa ku Jesu Kreste, a toba nama ya nama ya Hae, lisapo la lisapo la Hae, Linzwi la Linzwi la Hae. Nali pupo yenca. Nali mutu yomunca. Ne ufile mata a pilisa kwa mubili wa hae.

¹⁶² Mutalime se ne U ezize, se U eza ku mina ha U taha. Ha si kuezi kuli uzwe ubulele kuli, “Ni wa Methodist. Ni wa Baptist. Oh, Ni ziba kuli ha Ni lukeli kuzuba. Ha ni lukeli kuba ni se. Ha ni lukeli kutinanga liapalo za mufuta wo. Ha ni lukeli kuezwa se. Ha ni lukeli kuezwa sani.” Li mi fa mata a pilisa hahulu kufitela mu ba ni kuezwa cwalo. Li fa mata a pilisa kwa mibili ya mina ye shwa.

¹⁶³ Mutalime, U file mata a pilisa kwa mibili ya bona, kufitela ba fufela hahulu bukaufi ni Lihaliimu kufitela ha U to fa mata a pilisa kwa mubili wa bona kuli ba bulela ka mushobo wo neba si ka utwa kale fateni. Ne ufile mata a pilisa kwa mibili ya bona, ba bulela ka mushobo wo munca wa Lihaliimu. Neba filwe mata a pilisa a Kubatani kwa Mulimu, ka kolobezo ya Moya o Kenile. Mata a Mulimu afa bupilo na ba kolobelelize ku zani. Nebali mwa sibaka sa ku lapelela nako yani. Nebali kone bakona kulapela. Ba Sanhedrin kamba nto ifi kaufela hakuna ye ne ka ba bilaeza, kakuli neba filwe mata a pilisa. Nebali batu ba banca. Fani ki kasamulaho bamano kolobezwa.

¹⁶⁴ Mutalime Setefani yomunyinyani. Na tile ka nzila ye lukisizwe ki Mulimu, a fiwa mata a pilisa ki Mulimu; ataha mwa munyako, nzila ye lukisizwe ki Mulimu. Mi mane foo ha ne bailo mu bulaya, ku mu pobaula ka macwe kuisa lifu, ki hali, “Ni bona Lihaliimu li kwaluhile, Jesu uyemi kwa lizoho la bulyo la Mulimu.” Ani kona mata atisa kwa bupilo. Na filwe mata a pilisa kukambamela mwa sifuba sa Hae.

¹⁶⁵ Neku na ni Filipi, yomuñwi ya na tezi mata atisa kwa bupilo. Lu mu fumana kwa Samaria kwani, inza sweli ancafazo yetuna. Ona mata amatuna afa bupilo aa, kasamulaho amano kuba ku Kreste, ataha koo na nani batu baba likiti kiti bene ba teezeza ku yena. Mi ki Hali, “Cwale zwa fa, Filipi, Ni bata kuli uye mwa lihalaupa le, la Gaza, fa. Ni na ni muuna kwande kwani, ye ni bata kuli ukopane ni yena.” Mi hakuna puzo, hakuna puzo ni yekana, na tezi fela mata atisa kwa bupilo ani. Nali ku Kreste, nali mwa sibaka se si lukisizwe sa na kona kubulela Mulimu ku yena. Mulimu na ambozi ku yena. Nekusina puzo.

¹⁶⁶ Kuli, “Kihande, Na bulezi ni na ni ku ni bulelela kuli Ni ka foliswa, kono, Ha ni zibi cwale, Ni ikutwa bumaswe hahulu kacenu.” Oh, mawi! “Kihande, U ni bulelezi kuli Nina ni Moya o Kenile, mi fokuñwi Na kakanyanga ka zona.”

¹⁶⁷ Filipi na zibile handende Linzwi la Mulimu, 'kakuli na tile ka nzila ye lukisizwe ki Mulimu. Na si ka kakanya Mulimu, ka za kuli, “Kihande, Mulimu, Nina ni babañata hahulu mo, Ni lukela kuyemela. Ni lukela kubona mutoneli wa puteho Ni si ka eza kale. Ni lukela ku yo ambola ni bishopu,” ne kusina sika ka zona. Na takomezi za Mulimu, ona kwande mwa lihalaupa mwani ikela!

¹⁶⁸ A fumana muuna alimuñwi, yanali nduna, wa mu Ethiopia, mutu yomunsu ya na taha, inza bala Liñolo mwa Isaya. Mi ki hali, “Kana wa utwisisa so sweli ku bala?”

Ali, “Kana Ni kona kutwisisa cwani kwanda kuli mutu ani lute?”

¹⁶⁹ Filipi apahama mwa koloi mi akala ku ambola ni yena ka za Mulena.

170 Ki hali, “Mezi ki a, ki sikamañi se si ka ni hanisa ku kolobezwa?”

171 Ki hali, “Haiba u lumela ka pilu ya hao kaufela, moyo wa hao kaufela ni ngana, mata.” A tuluka mwa koloi ni ku mu kolobezwa.

172 Mi Filipi na tezi hahulu mata afa bupilo ani, kufitela, A mu likelisa mwa meto a hae. Munahane! Mwa mubili wa hae o shwa, sibupeho sa hae sa butu sa ngiwa, a zwa mwa meto a nduna. Ni lumela kuli yeo ki niti. Mulimu na ka muisa kusili fela, kwa Na mu tokwa. A pamulwa.

173 Mwa ziba, lifu mane halikoni kuzwisa sika seo ku wena, fani ha uli ku Krete, mwa sibaka sa Mulimu.

174 Amutalime kwanu, Mushe nana ni sona. Nali mupolofita yoo Linzwi la Mulena ne litile ku yena. Hakuna babañata... ki bo Kora babakai bene ba nanuhile ni kubulela kuli, “Lu tokwa kopano yetuna. Cwale ulika kunga sibaka sa kuba mutu ya kenile anosi fela.” Mulimu ali, “Ikauhanye ili wena, Ni ka mu miza fela.” Mi bo Datani, ni babañwi cwalo, ne ba si ka mu bilaeza, na zwezipili kuya ona cwalo.

175 Mi fani Mushe ha na shwile ni ku pumbekwa, ka Mangeloi, ona mata afa bupilo ani na inzi ku yena. Kakuli, myaha ye mianda ye eiti kasamulaho, ki yo fa uinzi mwa naha ya sepiso, inza ambola ni Jesu. Ona mata afa bupilo ani na sali ku yena. Sani kona sibaka sa Mulimu sa kulapelela.

176 “Ubulela sikamañi? U zibile cwani?” Na li mupolofita. Linzwi la taha ku mupolofita. Mi nali yena Linzwi la Mulimu leli bonahalile la lusika lwa hae. Amen.

177 Mwabona, ha ukoni kushwa, u filwe mata a pilisa. Oh, kambe keleke neika bona fela zeo, kuli ha ki sika so ka ba sona, u bile kale cwalo! Ki diabulosi yalika ku ku zwisa ku zeo.

178 “Kihande,” muli, “cwale Ni ka ku bulelela. Ni wa siemba se.” Hanina taba kamba u wa siemba sifi.

179 Mu lukela kupepwa, kubupiwa sinca, ku kolobezwa ka Moya o Kenile, ku Jesu Krete, kufiwa mata a pilisa kwa Linzwi kaufela. Moya wa hao, ku wena, uka bulela “ameni” kwa Linzwi kaufela la Bibe. Kwanda sani, haiba si—haiba si nyanganyisa toho ya sona ku yeñwi, u tokolomohe moya wo. Ha ki Moya wa Mulimu o kona ku kananisa Linzwi la Mulimu. Ona u ka buluka Linzwi la Mulimu. Ha u Li lumeli fela, kono u Li eza le Li pila. U bonahaza Linzwi la Mulimu. Eeni, muñaka.

180 Mulemuhe hape bona baba kenile ba Testamente ya Kale bani. Ka manzwi amañwi, mwatasa sitabelo sa kale, neba libelela yomunca yoo kutaha, nana ni lizwalo lelinde ku Mulimu. Mwa Mateu 27 lu bulelelwa kuli fani Jesu ha na zuhile ni kuzwa mwa libita, ili yene lu nyakalala fela lisunda nyana kwa mulaho, Paseka, bibe ibulezi kuli buñata bwa baba kenile bene ba lobezi mwa liluli la lifasi ba zuha mwa zuho ya Hae, ni kutaha

mwa munzi ni kubonahala ku babañata. Nebali sikamañi? Nebali ponahazo ya Linzwi la Mulimu lene li sepisizwe. Sibaka fela seo Mulimu a kopanela, mwatasa sitabelo sani.

¹⁸¹ Cwale mwa Matesalonika Bapili 4:16, Bibebe ibulezi hape kuli, kuli balumeli ba Testamente ye Nca ba ka taha ni Yena fani nako Ya taha hape, bona baba filwe mata a pilisa ku Yena cwale. Kana ukena cwani ku Yena? Ka kolobezo ya moya, mata a Mulimu, sibaka Sa kopana ku sona, ku Jesu. Cwale Jesu kona nzila ye lukisizwe ki Mulimu.

¹⁸² Cwale mulemuhe, Jesu na ikolwisisa luli ka sa Nali sona! Na ziba kuli Nali Mwana Mulimu. Na ziba kuli Na pepilwe ki mwalyanjo. Na ziba kuli Liñolo kaufela ne li iponahaza Lona liñi ku Yena. Na ziba handende luli, kufitela Abulelela bayahi ba tempele bani, ba lizazi lani, Ki hali, “Musinye tempele ye, mi Ni ka iyaha ka mazazi a malalu.” Munahane ka zeo. “Mu i bulumune, mi Ni ka i yaha sinca hape ka mazazi amalalu.” Kiñi? Neli Linzwi le li ñozwi la Hae.

¹⁸³ Davida naize, “Hanina kutuhelela Ya Kenile wa Ka mwa lihele, hanina kutuhelela moyo wa Hae mwa lihele, kamba nihaiba kuli Ni siye Ya Kenile wa Ka kubona kubola.”

¹⁸⁴ Cwale, Jesu na ziba kuli yani neli Yena. Hakuna puzo mwa munahano wa Hae. Mi Na ziba kuli, liholo ze sebente-tu, mubili wa bola, nako yeñwi mwahala liholo ze sebente-tu zani Na ka kutela kwa bupilo hape, kacwalo Ali, “Musinye tempele ye, Ni ka izusa hape ka mazazi a malalu.” Kiñi? Linzwi ne li ñozwi ka Yena. Ne ku ñozwi ka Yena, kakuli Nali yena ponahazo ya Linzwi la Mulimu le liñozwi la lizazi lani.

¹⁸⁵ Kihande, ku lukela kuba, haleluya, ku lukela kuba, muzwale, kwani kokuñwi, Linzwi la Mulimu le li bonahalile la Mulimu kacenu. Mi yeo ki nto yeswana, kakuli Na bulezi ka mazazi aa mi Na bulezi sene si ka ezahala mwa mazazi aa. U lu bulelezi kale. Lwa ziba se si ka ezahala. Mi lwa li bona ha li iponahaza ku wena, konakuli foo u mwa Keleke ya Mulimu. Kwande a zeo, wakona kuipiza kuli u, “Methodist, Baptist,” kamba sika sifi kaufela, zeo halina kubeleka. Nekuna ni fela sibaka silisiñwi sa makopanelo, seo ki ku Krete Jesu. Oh, kacenu, oh, kamo Ni batela kuli mutu kaufela abone seo, kubona mwa ka kenela, ku kolobezwa. Munyaliwa ki siemba sa Muuna hae. Keleke ki siemba sa Linzwi, ili yona ponahazo.

¹⁸⁶ Cwale ki keleke mañi yoli ku yona? Kana u mwa kopano fela nji? Haiba u cwalo, Ni ka ku bulelela hande cwale, u mwa Laodesia. Kono haiba u ku Krete, u sibupiwa sesinca, mi u mwa Keleke ya Mulimu yapila, ka ponahazo ya lika zeswana luli za Na ezize mwa lizazi la Hae li ka kuta fa mwa lizazi le, kuezwa lika zeswana za Na bulezi kuli Li ka ezahala. Kipeto, yeo ki Keleke ya niti. Mukena ku Yona ka kolobezo ya moya, isiñi ka kuikopanya, isiñi ka zeñwi hape, kono ka ku kolobezwa ka Moya

o Kenile mwa Mubili wa Hae. Ku lukile. Ki nzila fela ye lukisizwe ki Mulimu yeo A lu tomezi kuezwa, ki ku kolobezwa mwa Mubili wa Hae, ka Moya wa Hae.

¹⁸⁷ Jesu naize, ku Muñoli Joani 14:12, “Ya lumela, foo ha sa li ku Na!” Ki kabakaleo batu ba bulela kuli mazazi a limakazo a felile, ki kabakaleo ba bulela lika ze. “Ya lumela ku Na, isiñi kulumela fahamwa Na, kono alumela ku Na, misebezi ye Ni eza uka i eza ni yena.” Kiñi? Ki Bupilo bwa Hae. Ki mata a Hae mwa libelekiso za Hae, ze li ku mina, kona a li tumbulisa, yeza kuli i ye ni kuezwa misebezi ye ne i sepiselize kuezwa. Kamba, bupilo bwaka ku Yena, bu ni file mata a pilisa ka Moya wa Hae, kuli aeze Linzwi la Hae, ili libelekiso, ze beleka ka mata a Hae. Maheberu 13:8, “Jesu Krete ki ya swana maabani, kacenu, ni kuyakuile.”

¹⁸⁸ Cwale hape mwa Mareka kauhanyo ya 17, timana ya 30, ya Muñoli Mareka. Muteeleze, ka tokomelo. Jesu na sepisize lika ze mwa mazazi a mafelelezo, kuli Yena ki “ya swana maabani ni kuyakuile.” Na sepisize, mwa Malaki 4, kuli Uka “fetula lipilu za sicaba, mwa mazazi a maungulo, ku kutela kwa Tumelo ya bashemi.” Na sepisize cwalo. Na sepisize, libaka zeñata hahulu mwa Bibebe, lika za Na ka eza. “Niteñi fa nako nyana lifasi halina ku Ni bona, kono mina mu ka Ni bona; Ni kaba ni mina, ku mina kamita, mane kuisa kwa mafelelezo a lifasi.” Mi mulemuhe ku Muñoli Luka hape, 17:30, “Sina mo ne kuinezi mwa mazazi a Sodoma!”

¹⁸⁹ Mwa ziba ze ne ezahalile mwa Sodoma? Mutalime mwa California; isiñi fela California, United States; isiñi fela mwa United States, kono ki lifasi loote.

¹⁹⁰ Mutalime kutana kwa mwanana yoo! Kiñi, ne luna ni . . . Ne ni mi bulelezi zazi leliñwi, neba sweli kunga linyakisiso kwani za likolo kwa Arizona ko Ni pila, mi eite pesenti ya bana mwa likolo bana ni kusitana mwa booko. Kana bana ba bona bakaba sikamañi? Halukoni kuba ni lusika lusili. Lu kwa maungulo. Jesu na bulezi kuli lika ze lika taha.

¹⁹¹ Mutalime fa mazimumwangala kaufela ni lika ze sweli ku tisa litaba ze ka mulao. Ku ka taha nako, Na nuha, kuli sicaba si ka lyangana luli, kusitana kaniti, lifasi likaba cwalo. Bibebe ibulela fa litaba ze sabisa hahulu cwalo sina ze ba bonisanga mwa mafilimu kacenu, ze zwile kwa mai a libatana zeñwi za kale zekile za pila mwa lifasi ka myaha yemiñata luli mwa likitikiti ni ma milioni a zona, a ndondoka ni kutaha cwalo. . . . Yani ki nto yenyinyani fela, ku ze ka ezahala fani lihele ha li kwaluhile ni diabulosi ataha kuzwa ni ze komokisa za yona kaufela, za basali. . . kamba linziye ni milili inge basali, ni meno inge litau. Kiñi, lifasi li ka felela luli, mwa bupulumuki. Ha ki kwahule mwendi ki digiri fela iliñwi kuzwa kuzona cwale.

¹⁹² Oh, kwa kanya ya Mulimu, kwa Kutaha kwa Mulena Jesu, ka Moya o Kenile, ku ba baziba-cwalo, ka Kubateni koku pila kwa

Mulimu ya pila!

¹⁹³ Jesu naize, ku Muñoli Mareka mwani, Na ize, “Mwa lizazi lani Mwana mutu uka patululwa.” Cwale, muhupule, isiñi Mwana Mulimu. Natile ka mabizo a malalu a bana ba bashimani: Mwana mutu, Mwana Mulimu, Mwana Davida. Fani ha Na li fa lifasi, Na tile sina Mwana mutu, Na li mupolofita. Mwana mutu ki mupolofita. Jehova yena Kasibili na biza bapolofita, Jeremia ni babañwi kuli, “Mwana mutu, u bona sikamañi?” Jesu natile, kakuli Nana ni kutaha ku ya ka Mañolo, sina Mwana mutu. Mushe naize, “Mulena Mulimu wa mina uka zusa Mupolofita, ya swana sina na.” Mi Na na ni kuba mupolofita, Mwana mutu.

¹⁹⁴ Kono kasamulaho wa lifu la Hae, kupumbekwa, ni zuho, cwale Ubile Mwana Mulimu, yena wa buipiteli, ili Moya o Kenile.

¹⁹⁵ Kono Na sepisize, ku si kaba kale kutaha kwa nako ya maungulo, lifasi likaba sina mo ne li inezi mwa Sodoma, fani Mutu hana tile mwa mufuta wa butu; ba balalu ba bona, Mangeloi amabeli ni Mulimu Kasibili. Yani neli Mulimu. Bibeles ibulezi kuli neli yena. Cwale Ataha fafasi mi A iponahaza Iliyena fani, ka ku sikululela mukokoto wa Hae kwa—kwa tende kone kuinzi Sarah, ni ku bulelela Abrahama sa na nahana Sarah mwa tende. Ki niti yeo nji? Cwale, Jesu yena Kasibili naize, “Ka lizazi leo Mwana mutu ha patululwa,” ka manzwi amañwi, “Mwana mutu, bulumiwa bwa Jesu Krete yena Kasibili.”

¹⁹⁶ Keleke ika taha ka kubeiwa baba lukile ka Luther, ka kukeniswa ka Wesley, ka kolobezo ya Moya o Kenile, ni mwa Mapentekota, ni kukena mwa kupetahala kwa Mwana mutu, kuli foo Muuna ni Musala hae hane ba kaba Batu baba swana fela, Mulimu ukaba ya bonahalile hahulu ku Munyaliwa wa Hae, Keleke ya Hae, kufitela sibeli sa Bona babe baba swana, Kinto Iliñwi. Cwale mwa bona ko luinzi.

¹⁹⁷ Musike mwa swalelela kwa lizo zani ni lituto za litumelo. Ne li ze lukile mwa lizazi la zona, kono palisa se i shoshezi ni kutubula cwale. Ki nako ya peu. Yeo ki niti.

¹⁹⁸ Jesu na sepisize lika ze. Cwale, foo ha lubona Mulimu ha eza sepiso ya Hae kupila fapila luna ni kubona kuli iteni ku luna, mi Moya wa Hae wa pila ku luna, yeo kona nzila inosi fela ya milapelo, sibaka sinosi fela sa kulapelela, nzila inosi fela ya kulapela ka yona, “Kakuli hakuna katulo ku babali ku Krete Jesu.” Mulimu na file sepiso. Jesu naize, “Lika ze Ni eza, muka lieza ni mina,” ni sa Na ka eza mwa lizazi la mafelelezo. Mo li tahela mwa lusika lo, hakuna liseli kamba lizazi, ikona kuba nako ya—ya lififi, kono naize, “Nako ya manzibwana, ku kaba Liseli.”

¹⁹⁹ Lizazi li pazulelanga kwa upa ni ku likelela kwa wiko. Ona lizazi leliswana le li pazulelanga kwa upa li likelelanga kwa wiko, zwelopili izamaile ni lona. Li zamaile fahalimwa libaka zetalu za mezi, mifuta yemilalu ya kolobezo. Oh, eeni, kuzwa

kwa Asia, kukena mwa Europe; kuzwa kwa Europe, ni mwa England; ni kuzwa kwa England, ni mwa United States.

200 Mi cwale lu kutezi hape, mi fa luinzi mo musihali wo, kwa Likamba la Wiko, koo kuna ni lukwakwa la sibi ka mata kaufela a lififi kulo mo. Bona bihi bamakande baa ni mazimumwangala, ni baana inge ba tubeta basali mwani, ni kufa sifanu mihupulo ya basizana babanyinyani.

201 Kikuli mwa ziba kuli muuna kaufela ya tubeta musali una ni swanelo ya ku mu nyala kuya ka litaba za muikutekelo? Ka manzwi amañwi ki kezo ya foso. Luli, ku cwalo. Eeni, muñaka. Ki sikamañi seo? Ki maikuto a muuna mwa mulomo wa muuna, ni maikuto a musali. Fani maikuto a muuna ni musali hataha hamoho, ki foso.

202 Mutalime Hollywood, mutalime basizana babanyinyani baba lobala mwa libaka za mabapalelo ze, mi bashimani inge ba alabana fahalimwa basizana baa, ni lika ze cwalo, mane ne ba kuopela mwa likwata za ba kwaya. Mi ba bo Elvis Presley, ni babañwi cwalo, bo lunani kacenu, ki maswabisa kwa libizo la America, ku se ne ba lwanezi bashemi baluna bakale ni kusululela mali ka sona ni kushwela.

203 Kono nako se itile yeo mubuso kaufela una ni kuzwa mwa nzila, kakuli kuna ni Mubuso wa Mulimu o tomilwe mwa pilu ya mutu, ka kolobezo ya Moya o Kenile ni Kubateni kwa Jesu Krete. Mi Krete uka taha ku Munyaliwa wa Hae ni ku toma Mubuso fa lifasi fa, osike wa sinyiwa. U kena cwani mwa Mubuso woo? U pepilwe ku Ona. Kikuli muziba cwani zeo? Mu buluke fela... Kikuli mukona cwani kuba mwa mubuso ni kupalelwa ku lumelelana ni mulena a ona? Mwabona, ne mukaba... Mi Mulena ki Linzwi. "Kwa simuluhlo nekuna ni Linzwi, mi Linzwi nali ku Mulimu, mi Linzwi neli Mulimu. Mi Linzwi la ezwa nama mi la to yaha ku luna. Yena ya swana maabani, kacenu, ni kuyakuile."

204 Kana neba zibile cwani kuli Nali yena Mwana mutu? Na talimile kwani mwahala sicaba ni ku lemuha minahano ya bona. Lu ziba kuli yeo ki niti. Yena wa swana kacenu. Kikuli mwa lumela cwalo?

205 Kana Billy ufile makadi a litapelo? Zeo ki zeñwi za litaba ze Ni libezi ku mu buza. Kana ufile makadi a litapelo? [Kopano ili, "Eeni."—Mu.] Ufile makadi a litapelo. Ku lukile.

206 Ni ka ku bulelela. Haiba muna ni tumelo yeñata, Ni na ni tumelo ya kulumela kuli Mulimu, Yana file sepiso, wakona ku iponahaza Iliyena kuba Mulimu ona fa, kusina mutu ya kona kutaha kwa katala kwanu. Ni ikutwa kuba ni mayemo amañwi, kuya ka sepiso ya Linzwi la Mulimu yapila. Mutalime kwanu, mutuhele ni mi bonise nto yeñwi. Ona mata atisa kwa bupilo aa, luka i tusisa Ona. Mutuhele ni mi bonise. Ki ba bakai baba lumela kuli muna ni mata atisa kwa bupilo ani? [Kopano ili,

“Ameni.”—Mu.] Kihande, ki butata mañi bobuli ni mazoho a mina fa bakuli?

²⁰⁷ Fani balutiwa bani ha ba amuhela mata a tisa kwa bupilo ku bona, ka Lizazi la Pentekota, ki sikamañi sene ba ezize? Ba zwela kwande ni ku yo beya mazoho fa bakuli, mi ba foliswa. Jesu naize, mwa Mareka 16, “Li ka zwelapili kuisa kwa mafelelezo a lifasi.” Ku kanga nako yekuma kai, kuisa kwa lusika lwa baapositola? “Muye mwa lifasi kaufela, mukutaze Evangeli kwa sibupiwa kaufela. Lisupo ze li ka latelela baba lumela; ha ba ka beya mazoho a bona fa bakuli, bao ba ka foliswa.” Ao kona mata atisa kwa bupilo sina mwa na inezi kwa masapo a Elia, masapo a Elisha. Mi ona mata aswana afa bupilo ainzi fa balumeli bene ba ba zuhile. Haiba ona mata aswana afa bupilo ani ateni ku luna, mubeye mazoho a mina fa bakuli, ba ka foliswa.

²⁰⁸ Ni lemuhile fa, Ni batile kutuhela kuba ni temuho, ni hanyinyani, ni kubeya fela mazoho aka fa bakuli. Ni bile ni lemuha kuli, mawi, lika ze Ni si ka... Ne ni si ka fita kwa sikwata tuna sa batu, ka manzwi amañwi. Nzila ye, Ni fita hahulu ku ze Ni kile na fita ku zona. Mi Ni fumana linepo zende, ka kukena fela mwa mazoho a Mulimu, ni kubulela kuli, “Mulena Mulimu, U li sepisize. Ki sepiso ya Hao; ha ki yaka, ki ya Hao, mi U sepisize kuli Uka eza cwalo. Mi Ni Ku boni ha u eza cwalo. Mi Ni ka lumela kuli Uka eza cwalo, kakuli Ni kolobelizwe mwa Mubili wa Hao, mi Moya wa Hao fa upaka kuli yeo ki Niti.” Ameni. Sani kona sibaka sa kulapelela. Mi mukena mwa sibaka, “lika kaufela za konahala.” Kipeto mufita fa sibaka sa kuli maikuto a—a hao ni milelo, kwa lika zo bata za hao, i lukile fela mwa tato ya Mulimu. Mi foo ha u ka beya mazoho a hao fani ni ku lumela cwalo, li ka ezahala. Kikuli mwa lumela cwalo?

²⁰⁹ Na lumela, kadi iliñwi ya tapelo isika bizwa kale, kamba sika sifi kaufela, kuli Mulimu Yamata kaufela wakona ku ni bulelela so nani kwande kafoo, ni so no lukela kueza, ni so no sa lukeli kueza. Foo ki kuamuhela mayemo, kihande, Ni ziba kuli yeo ki niti, kono zeo kona za bata Mulimu kuli lueze. Kikuli mwa lumela cwalo? [Kopano ili, “Ameni.”—Mu.] Ki babakai baba ka lumela kambe Mulimu na ka eza cwalo? [“Ameni!”]

²¹⁰ Hakuna mutu yainzi kwa pata kuna yo Ni ziba, yo Ni kona kunahana ka yena, kamba kubona mutu kaufela ye Ni ziba. Ki babakai baba ziba, kwande kwanu, luna kaufela lu baenyi, mu nanule mazoho a mina. Ya ziba kuli hakuna se Ni ziba ka wena, munanule mazoho a mina. Kai ni kai mwahala sicaba, ya ziba kuli hakuna se Ni ziba ka wena. Ni sepa kuli ki kai ni kai, sihulu ona kwanu. Cwale mwendi batu babañwi fela... Ha ni ba zibi. Neba si ka nanula fela mazoho a bona, kono Ha—Ha—Ha ni ba zibi, nihakulicwalo. Ni lumela kuli Ni bona Richard Blair yainzi ona mo. Ni lumela kuli yeo ki niti. Na kona... Ku unsufezi fafasi kwani. Kuna ni liseli neku le. Ha ni boni.

211 Kono mutalime fa, Ni lika ku mi bulelela, kuli, foo mata atisa kwa bupilo ani ha taha ku mina, ki Jesu Kreste. Foo Jesu ha na beile mazoho a Hae fa bakuli, neba folile.

212 Foo Jesu hana na ni mata afa bupilo ku Mu fa mata a pilisa, ka kuba Mutu, Na talima fande ni kuziba milelo yeneli mwa sicaba, ku ba bulelela se ne ba nahana, se ne ba ezize. Mukokoto wa Hae ufulalezi kubona, a ba bulelela nto yeswana, “Kiñi ha mu bilaela mwa lipilu za mina?” Musali yana sweli sapalo sa Hae, Ki hali, “Ki mañi ya Ni sweli?” Atalima kwa ni kwa mi a mu fumana, ki hali, “Ni lemuha kuli mata azwile ku Na. Tumelo ya hao i ku folisize.” Yani ki Jesu Kreste. Seo si paka seo koo Keleke i inzi, ni seo mata atisa kwa bupilo luli a Mulimu aeza ku mutu. Kana mwa lumela cwalo?

Ha lu inamiseni fela litoho za luna fa nako nyana.

213 Mulimu Yomunde, lubile ni ndwa ni Satani musihali wo, fa ma maikulofoni aa, ka kuziba kuli sicaba sani mane ne si si ka utwa licika za zona, kutibeha ku zani. . . mwa muyaho sina cwalo. Kono Na lapela, Mulimu, kuli Moya o Kenile unge se ne si lukela kuba cwalo, Mulena, ku lumeleza sicaba kubona kuli ha lu sikwata sesiñwi se si ishwezi se si sepa fela cwalo. Mulimu, lwa pila cwale, lu filwe mata a pilisa ka mata a zuho ya Kreste. Jesu Kreste upila ku luna. Lwa lumela cwalo, Mulena.

214 Ha lu ipapati kuba ni kanya ya luna bañi. Inge fa Lilundu la Petuho, koo mañi ni mañi wa luna u yemelwa kwani; nekuna ni Mushe, ya na shwile ni kuzuha hape; nekuna ni Elia, balumeli baba fa bupilo baba ka ngelwa ka lizazi la mafelelezo. Oh, neba boni cwale, foo ha ba talima kwa mulaho, ba bona Jesu fela. Lwa ziba, Mulena, halu lati kuli sicaba si lu bone. Haluyo mo ka mulelo wani. Kusike kwa ba cwalo!

215 Kono, Mulena, sa tabisa lipilu za luna foo ha lu bona Jesu a fiwa kanya mwahala luna; foo ha lu Mu bona ha fiwa kanya, foo ha lu bona Linzwi la Hae, ili Yena Linzwi; foo ha lu bona lwa kona ku ipalela zona mo mwa Bibeke, koo Na sepisize kuli Uka eza cwalo, kipeto ni ku Mu bona inza beleka ku luna, O Mulimu, ka mo li lu utwiseza baba ikokobelize, ka kuziba kuli Kubatani kwa Hae ya pila. . .

216 Hakuna ze lu ikopanyize kuzona kamba kubata ñambekelo ya lika. Lu lumela fela, Mulena, kuliba kwa Bupilo Bobusafeli. Mi U lu swaile mwateni ka kolobezo ya Moya o Kenile, ni kufa mata a pilisa kwa mibili ya luna, ni kufa mata a pilisa a bupilo kwa mioya ya luna, ni ku lu fa mata a pilisa kipeto kubona lipono, ni kupolofita, ni kubulela ka malimi, kubona lisupo zetuna ni ze komokisa ha li ezahala. Kiñi, ki Mulimu yapila. Lu mwa Mubili wani. Foo, kwa lifasi, ki bukuba ku baba shwa; kono ku luna baba lumela, ki mata a Mulimu, atisa kwa Bupilo Bobusafeli. Lwa itumela ku Wena ka zona, Ndate.

²¹⁷ Cwale ha ku zibahale ka lizazi le, Mulena, kuli Wena u Mulimu, kuli Ha u si ka cinca muhupulo wa Hao ka Linzwi li liliñwi leo U kile wa bulela. Mi Wena uya swana maabani, kacenu, ni kuyakuile, mi yena—yena mi kona Nzila fela inosi yeo Mulimu afile. Mutu fela anosi yo Mulimu akile abeya Libizo la Hae ku yena, neli Mwana Hae Luli Yana lwezi Libizo la Hae, Jesu; Mulimu, Jehova, Mupulusi, Emanuele, Munyako kwa mulaka wa lingu; Yana Liteni, Yali Teñi, mi ni Ya ka Taha; yena Mubisi ni Mwana, sibeli sa Mubisi ni Mwana a Davida; yena Naleli ya Kakusasana, yena Mutungulu wa mwa Musindi. O Mulimu, ha ki bunde ni boo! Ki kabakaleo Isaya naize, “Muelezi, Mulena wa Kozo, Mulimu yamata, Ndate wa kamita.” Oh, haluna Ndate usili kwanda Hao, Mulena. Ki wena Ndata luna. Wena u Maa luna. Wena u kaufela seo luli sona, kaufela se lukona kuba sona. Haluna kubona sesiñwi fela kwanda Jesu ya filwe kanya!

²¹⁸ Ndate, Hakulata ni ezize ze fosahezi ku ze, musihali woo, kono unge mihupulo ya pilu yaka, mi u ni utwe, Mulimu yomunde. Mi ha ku bulelwe, zazi le, kuli Jesu Kreste na filwe kanya ona mwa tempele ye. Lumeleza cwalo, Ndate, kakuli lu kupa ka Libizo la Hae, mi sina ha Ni nze ni libelela ka buikokobezo ni sicaba se, ku Kubona u zamaya ka Moya wa Hao. Amen.

²¹⁹ Cwale Ni bata kuli mu ni ezeze nto iliñwi ye. Ni bata ku mi buza puzo iliñwi kabunolo. Ni bata kuli mu ni alabe sina hane ikaba nako ya mafelelezo yo ne mu ka alaba mutu mwa bupilo bwa mina. Kikuli mwa lumela kuli ki Niti? Kikuli mwa lumela kuli hakuna keleke kamba kopano ye kona ku lemuhiwa Fapila Mulimu? Kana mwa lumela cwalo? Hakuna nihaiba iliñwi. Ki bani fela baba pepilwe ku Jesu Kreste, ba ba amuhela Libizo la Hae! Yeo ki niti.

²²⁰ U amuhela Libizo la Hae foo ha u so pepilwe mwani, isiñi ka kolobezo ya mezi. Nihaike u kona ku kolobezwa ka Libizo la Hae, kono seo ha si lwali ka Libizo la Hae. U nga Libizo la Hae ka kupepwa, isiñi ka mezi. Mwabona, u kolobelizwe ka Libizo la Jesu Kreste, eeni, muñaka, mwa kutwano; kono u kolobelizwe ka Moya o Kenile, ku Jesu Kreste. Kacwalo wakona ku kolobezwa linako ze mwanda, ka nzila kaufela ye ubata kueza ka yona, ka nzila yeñwi, ha ku koni kuba shutano. Kono foo ha u kolobelizwe hañwi ka Moya o Kenile, mwa Mubili wa Kreste, u ba mwana wa mushimani kamba wa musizana wa Mulimu, mi, “Linzwi kaufela ki la niti!” Mi, konakuli, Na ezize cwalo ka mulelo woo.

²²¹ Sina hane Ni bulezi zazi leliñwi, fani Mulimu ha na zamaile ni ku nata lizazi mwahala lifasi, Na ziba likota za nzalu zani ni lika kaufela ze ne li mwatasi a lifasi lani. Yena . . . Nebali siemba sa lifasi ka nako yani, kacwalo kona mo ne muinezi mina.

²²² Mi foo ha Na zusize Mwana Mulimu, la Paseka kakusasana, ni kuluma Moya o Kenile, neli ku fa mata a pilisa, hape, yona

peu ya Bupilo Bobusafeli yani, kuli Na zibile kale ku si kaba kale mutomo wa lifasi, kuli ze li kaba fa. Na zibile kuli maikulofoni ye ika eza mo i ezelize manzibwana aa. Na ziba kuli uka ba ni mubonelo wa lika wo u nani. Yena ha cinci. Hamukoni ku nahana ka ngana ya mina, mu lukela fela ku li amuhela. Kono, mutuhele ni bulele nto iliñwi ye, yena Mulimu yaswana yani uyemi mo, musihali wo, mwa sicaba sa Hae.

²²³ Kamba u wa Methodist, Baptist, Pentekota, kaufela so kona kuba sona, usike wa sepa mwa kopano yeñwi. Kakuli, haba koni kuba kopano. . . I ezizwe ka lituto zeñata ze shutana. I ezizwe ka sikw- . . . Una ni kuba mutu unosi, ku Mulimu. Una ni kuba mutu unosi. Mulimu utalimana ni wena, isiñi mwa keleke ya hao. U lukela kupila bupilo bwa mufuta wo munde mwa keleke ya henu kamba kopano ko u lapela teñi, u lukela kupila bupilo bwa mufuta o lukela kuba ni bona. Kono mwa bona, ba amuhela lituto za litumelo, ni zeñwi cwalo, kuli mane haukoni nihaiba kukena mwa minyako ya bona haiba ha u lumeli cwalo. Kacwalo kona kuli Mulimu ukona kutaha cwani mwateni, foo Linzwi la Hae ka tundamo la iponahaza?

²²⁴ Kikuli Luther na zibile cwani ka za kolobezo ni—ni ku kutisezwa kwa Moya, foo hana kutezi mwa lizazi lani? Simela ne si si ka hula cwalo. Mane nihaiba Wesley na si ka li ziba. Mi nihaike yona Mapentekota ha i zibi ze ezahala kacenu. Ki nto yeswana, ye hula kuzwa ku mina. Yeo ki niti. Ibile cwalo mwa lusika kaufela, mi kamita ikana iba cwalo.

²²⁵ Mi Na kona kubonisa, ka Bibebe, lo ki lusika lwa buloto. Muhupule, kasamulaho wa ancafazo yetuna ye. . . Hakisikaba kale kopano yeñwi ye zuhile kuzwa nako ya Pentekota. Ha kukoni kuba cwalo. I zwile mwa sikapi kutaha kwa buloto, mi hakuna nto isili hape kwanda buloto. Leo kona libaka. Myaha ye fifitini. . . Hañata, ibanga fela myaha yemilalu, mi kipeto ku ba ni kopano ya ancafazo ifi kaufela. Mubuze wa litaba za kale kaufela. Kono hakuna kopano mwa mulaho wa Se. Ba likile kuzusa Pula ya lizazi la Maungulo, kono mwabona sene si ezahalile ku yona. Ha ikoni. Ki buloto cwale. Eeni, muñaka. Hakisana lishimbelo nihanyinyani. Seli bubeke bwa niti. Krete u mwahala sicaba sa Hae. Kikuli mwa lumela cwalo?

²²⁶ Ha lu kaleleñi *fa*, *fa* bulilo bwa kwatasi. Hanikoni ku kalela mwahali mwani, ka kubona kuli kuna ni babañata ba mina. Ki ba bakai baba ni lumela kuba mutanga Hae? Mube ni tumelo ku Mulimu! Ki babakai *mo* ba ba lumela cwalo ka nzila yeswana, muli, “Na lumela ka pilu yaka kaufela”? Cwale mane Mulena Mulimu a lumeleze taba ye ku luna, kuli mukone kubona mata atisa kwa bupilo. Ki nto yeñwi, yeli bupaki bo bu butokwa, bo bu paka cwalo.

²²⁷ Eeni, mutu wa kona kubulela kuli, “Oh, *se* ki Sani, *se*, *sani*.” Kono ha si be ni kezo.

228 Cwale, ha ku konahali kuli ni zibe taba yeñwi ka mina. Mwa ziba cwalo. Ha ni zibi konji fela mutu alimuñwi, ye Ni talimezi, mi yani ki Revurendi Blair yainzi fani, kuzwa kwa mulaho kwa upa, Na lumela ki Arkansas kamba kokuñwi kwa mulaho kwani. Yani ki yena fela anosi mwahala sicaba, yo Ni bona kuli Na ziba. Mi Mulimu uziba kuli yeo ki niti. Kacwalo ilukela kuba nto yeñwi yakuli. . .

229 Ni bona fela zeo kulo fa, kalibe yomunyinyani yo yainzi kwa mafelelezo kwani, una ni butata bwa moya bo u sweli kulapelela. Kikuli u lumela kuli Mulimu uka otolola butata bwa moya bwani ku wena, ni ku bu kondisa? Ku lukile, wakona kuba ni zona.

230 Beya lizoho la hao ku kalibe yomuñwi yainzi ku wena, kakuli una ni butata bwa mwa mba bwa sweli kulapelela, ni yena. Eehe. Ki niti yeo, kezeli? Nanula mazoho a hao mwahalimu haiba ki niti. Ha ni ku zibi, nali kuba ni ku bone fateni mwa bupilo bwaka. Basizana bababeli babansu.

231 Cwale, ki sikamañi seo? Kana zeo ha ki zona fela za Na bulezi kuli kona mwa Na ka ezeza? Ona cwalo fela.

232 Ki yo fa kalibe yainzi, yasweli kutalima fafasi fa; yainzi, ya ni talimezi. Una ni butata bwa pilu. Kana u lumela kuli Mulimu uka folisa butata bwa pilu? No inzi fani inge u lapela, “Ni lakaza kuli kambe Ne ni ka fita kwani.” Ki niti yeo nji? Nyanganyisa lizoho la hao sina *cwana*, ki niti. Kana Ni zibile cwani so no bulela mwa tapelo ya hao?

Mwabona, ulumele fela. Kona fela zo lukela kueza, ki kulumela.

233 Fa kuinzi kalibe ona fa ya ka shwa ona fa haiba ha foliswi. Una ni kansa. Kikuli wa lumela kuli Mulimu uka folisa kansa? Eeni. Wa lumela cwalo? Wena, kakuli ne u liyeha ku nanula lizoho la hao, kana wa lumela kuli Mulimu wakona ku ni bulelela yo uli yena? Misi. Gunn. Cwale, haiba yeo ki niti, nyanganyisa lizoho la hao sina *cwana*, mwabona. Ku lukile. Zamaya kwa ndu, Jesu Krete uka ku folisa.

“Haiba ukona fela kulumela, lika kaufela za konahala.”

234 Sani si natile kalibe yainzi fani ya tinile kuwani yensu, inza ni talimezi. Ni yena una ni kansa. Kana wa lumela kuli Mulimu uka ku folisa? Kana wa lumela ka pilu ya hao kaufela? Ni bulela ku musala Bo. Miller. Kana wa lumela cwalo? Ha ni muzibi musali wateni, nali kuba ni mubone fateni mwa bupilo bwaka, mi Mulimu mwa Lihalimu uziba kuli yeo ki niti. Amen.

“Haiba u kona ku lumela!”

235 Ki yo fa musali yomunsu yainezi kwa mafelelezo kwanu, u inamisize toho ya hae fafasi. Na sweli kubala, u sweli kubala ka za mulatiwa wa hae, ki mutu yasweli kulapelela. U tile, mane, ku to lapela. . . kuli ato lapelelwa. Batili ha yo mo, ki muuna hae. Yeo ki niti. Musali. . . Muuna wateni ha yo mo. U kwa lapela. Ubile

ni kupazuliwa, nji cwani? Yeo ki niti. Na katazeka ni butata bwa libelenge, ni zeñwi cwalo. Yeo ki niti, nji cwani? Ukaba fela hande. Tumelo ya hao neina ni mata ka zona. Kikuli u lumela kuli yeo ki niti? Amen.

²³⁶ Kikuli hamuboni kuli Jesu Krete ki ya swana maabani, kacenu, ni kuyakuile? Mubuze sicaba seo. Li ile mwahala sicaba kaufela. Kikuli mu lumela kuli Uteni mo? Kana mwa ikutwa kuli mata atisa kwa bupilo ani a ku mina? Kihande, yani ki Mulimu ya mi folisa, balikani. Kana mwa lumela?

²³⁷ Cwale kana mu ka ni ezeza nto iliñwi, fapila . . . ? Ki ba bakai mwahali mo baba kula? Ha lu boneñi munanule mazoho a mina. Cwale seli bukaufi ni faifi kiloko. Mubeye mazoho a mina ku mutu ni mutu, mi fela halu . . . Musike mwa bulela linzwi cwale, mubeye fela mazoho a mina ku yomuñwi—ni yomuñwi. Ni bata kuli mueze nto yeñwi.

²³⁸ Uli, muuna ya inzi kwa mulaho kwanu, una ni sikoto sani fa mukokoto wa hae. Kana wa lumela kuli Mulimu uka zusa sitombo sani mwa mukokoto wa hao, muñaka? Kana wa lumela kuli Mulimu uka ku folisa? Mucaha yomunyinyani, ya ni talimezi, mi na hupula kuli na ka fitelelwa. Nanula lizoho la hao mwahalimu, muñaka. Yeo ki niti. U lumele ka pilu ya hao kaufela, Mulimu uka ku zwisa sona.

²³⁹ Haleluya! Ni swabisa nyangela ye kaufela, ka Libizo la Jesu Krete! Haiba mwa kona, haiba . . . Lizwalo la mina, musike mwa lumeleza kuli li sinyiwe ka ku sa lumela, musike mwa tuhela kuli lifikanyiwe. Kikuli hamuboni Mwana mutu, yena Mwana mutu mwa mufuta wa Liñusa la sipolofita, ya kuta hape mwa Keleke ya Hae, mwa sipolofita, kupatulula Jesu Krete yaswana maabani, kacenu, ni kuyakuile? Ha li si ka ezahala kale mwahala lusika, haisi kufitela ka nako ye. Mwabona? Ki yeo ponahazo ya teni.

²⁴⁰ Keleke ki sikamañi? Kana mukena cwani ku Yona? Foo ha mu se mukeni mwateñi, lika kaufela zeo Jesu Krete nali zona, uba zona, mane neba kuba mwana wa mushimani ni wa musizana wa Mulimu. Na tiloba wena kuli mukone kuba Yena.

²⁴¹ Taba yatani ki kuli, wa saba kuitusisa yona, kamba mwendi hamuna swalisano ni Linzwi la Hae. Cwale, zeo halina kuezwa bunde ni hanyinyani, mi Ha—Ha nina taba ka so eza. Haiba ha u tahi ka kutala mwa Linzwi lani, halina kubeleka. Ki mañi yakona ku ni tameleza litaba A bulela ni ku sepisa mwa lizazi le, ze ne si ka ezahala? Konakuli musike mwa nepela kopano ya mina ku na, 'kakuli ha ina ku beleka.

²⁴² Haleluya! Na ikutwa cwalo, Ni ziba kuli Uteñi mo. Ni sepa kuli Uteñi mo. Na ziba kuli cwale kuna ni mata atisa kwa bupilo amañaka mwa Keleke ku to folisa mañi ni mañi kaufela yaliteni mo. Kikuli mwa lumela cwalo? Kihande, kipeto, mwa kona?

²⁴³ Kana mwa lumela mwa kulapelela bakuli? Kana mwa lumela kuli Jesu naize, “Ha ba ka beya mazoho fa bakuli, mi bao baka foliswa”? Ku lukile, amu beye mazoho amina ku mañi ni mañi cwale. Usike wa itapelela. Lapelela mutu ya tatama. Wa ku lapelela ni yena. Cwale ka kukuza ni ka likute.

²⁴⁴ Mulena, ka mo Ni itumela ku Wena, ka kuyema fa katala fa ni—ni ku kutaza Linzwi leli shutana hahulu kwa munahano wa sicaba kacenu, kufitela hane ba ka Li biza kuli “tuto ya buhata,” neba ka Li biza kuli “bulapeli bwa milimu,” neba ka Li biza kuli “mioya yemaswe,” sina mo neba ezelize, fani, “Baalezebubi.” Kono ku Ku bona mwahala sicaba sesinde se, musihali cwana wo, kufetuha ni kupaka ka kubonisa hande ze kutalizwe, kuli Ki yona Niti.

²⁴⁵ Mulimu, se ki sicaba sa Hao. Ki—ki diabulosi u likile kulyanganisa ma maikulofoni, ulikile ku lyanganisa mihupulo ya sicaba, ulikile ku ba hanisa ku utwa Se. Kono Ni lumela kuli ba ka Li amuhela, nihakulicwalo, Mulena. Ni ba kupela kuli ba Li utwe. Ni ba kupela kuli ba Li amuhele. Lumeleza, Mulena, balumeli baa, ka mata afa bupilo, kuli foo bona. . . haiba ha ba pili ku isa kwa kubona Kutaha kwa Hao, kuli mata atisa kwa bupilo ani aka ba zusa ka lizazi la mafelelezo.

²⁴⁶ Lumeleza ona fa cwale kuli mata afa bupilo ani afe mata kwa tumelo ya bona, Mulena, ku se ba eza. Kuna ni mulumeli ya beile mazoho ku mulumeli, mubili fa mubili, mata kwa mata. Mi ki mata a Mulimu, ka mwana mushimani wa Mulimu kamba mwana musizana wa Mulimu, ka Mwana Mulimu. O Mulimu, mi Satani a tamulule sicaba se! Mane ba foliswe musihali wo, ka ku zuha, ni ka mata atisa kwa bupilo a Kubateni ku zibahala, kwa Jesu Krete. Ka Libizo la Jesu Krete, mane ha kube cwalo!

²⁴⁷ Mazoho a mina fa batu ana ni mata a fa bupilo ku ona, haiba mu filwe mata a pilisa. Kana mutile kwa Bupilo? Kana Krete ubile wa niti ku mina? Kana mata a Mulimu a bonahalile? Kana muinzi mwa Keleke yani, Keleke ye lukisizwe ki Mulimu? Mu kena cwani ku Yona, kana muziba cwani kuli mu filwe mata a pilisa ku Yona? Milelo ya hao kaufela, buino bwa hao kaufela, bu ku Krete cwale. Mi Krete uteni mwahala sicaba, inza iponahaza Iliyena kuba yapila, kubonisa kuli Uteni mo mwa mazazi a Sodoma.

²⁴⁸ Ni mazoho a sicaba sani, kuli bupilo bwa bona bu cincizwe kuzwa kwa baitamaeli mwa mikwakwa, kuzwa kwa macakolwa, kuzwa kwa mahule fa mikwakwa, kutaha ku baba kenile ba niti ba Mulimu, baba filwe mata a pilisa. Mazoho a bona abeilwe ku wena. Ba inzi mwa Keleke, ka kolobezo ya Moya o Kenile, mata aswana na li fahalimwa masapo a Elia. Ona mata aswana ani abeilwe fa liheta la hao, fa mazoho a hao, fa litho za mina, ona mata aswana afa bupilo ani; ni Yena inza yemi fa inza bonisa kuli Wa pila ka kuzuha kwa bafu, inza iponahaza Iliyena kuli

Wa pila, fa cwale ka kuezwa lika zeswana za Na ezize ni kubonisa kuli Ki yona Niti. Amen!

249 Kana mwa Mu lumela cwale? Kana mu lumela kuli mazoho a beilwe ku mina ao ki mazoho a bumulimu, kana mwa lumela kuli Moya wani o fa bupilo u ku luna cwale, ku lueza kuba baba lyangani mwa lifasi, kana mwa lumela kuli ani kona mata a Hae afa bupilo? Kana mu lumela kuli mu mwa Keleke ya Hae? Konakuli, haiba mu cwalo, ni kulumela kuli mazoho ao a beilwe ku mina a kenile, a laelwa ki Mulimu; konakuli Na mi laela, ka Libizo la Jesu Krete, ku yema ka mahutu ni kuamuhela foliso ya mina, mañi ni mañi yabile akula.

Oh, Mukreste, mu lemuhi se si ezahalile?

250 Kana mwa lemuhi, kwande mwa mikwakwa yani kuli kuna ni ma milioni a batu baba zamaya mwa mikwakwa ye, kacenu, ba ba si sika mwa lifasi kwanda musili wa atomic? Kikuli mwa ziba kuli batu bani ba shwile mwa sibi ni mwa bumaswe, mi bapila mwa bunsu; mwa likeleke kaufela, ka lituto nyana zeñwi kamba nto yeñwi cwalo ka kubuluka sika sesiñwi, ni ku si biza kuli bulapeli?

251 Kikuli mu lemuhi kuli mu zusizwe mwa lifu kukena mwa Bupilo, mi mu kolobelizwe mwa Mubili wa Mulimu ya pila ya pilisize mibili ya mina, mo ku na ni kubulela ka malimi ni kutoloka malimi, kubona Jesu Krete ha iponahaza mwahala luna? Kiñi, butuku ne bu sa koni kuyema mwa sikwata se si cwalo se. Tuhela tumelo ya hao i libe ku Yena, u Mu lumele! Uli, “Mulena Mulimu, Ni lumela ka pilu yaka kaufela,” mi uka ba hande.

252 Kikuli kuna ni baezalibi mo baba tabela kutaha mwa Mubili wani? Munanule mazoho a mina, mi muli, “Nali kuba ni tahe ku Zona, Nali kuba ni tazwe ka Moya o Kenile, kono, Muzwale Branham, Na U lakaza luli musihali wo. Kana uka ni lapelela kwateni?” Munanule mazoho a mina. Musike mwa swaba, muinzi Fapila Hae. Mutalime fela mazoho! Mutalime mazoho!

253 Cwale mutu kaufela ya bata kolobezo ya Moya o Kenile, nanula mazoho a hao, kaufela fo uinzi, ba U bata kaufela.

254 Cwale mina babana ni Moya o Kenile, baba yemi bukaufi ni bona, a mu ba beye mazoho a mina a kenile, kuba kambeka mazoho. “Haiba Moya o Kenile, ono zusize Jesu kwa bafu, uinzi ku mina, u ka fa mata a pilisa kwa mibili ya mina ye shwa, kuzwa kwa lifu kutaha kwa Bupilo.” U tisa mubili kaufela mwa ku utwela za Moya. Cwale ha lu inamiseñi litho za luna, mi mañi ni mañi alapelele sicaba se si bata kolobezo ya Moya o Kenile sani. Mi Ni lumela kuli Mulimu uka taza mañi ni mañi wa mina, ona fa cwale, ka Moya o Kenile.

255 Ki kabakalañi ha lu libelela, balikani? Mu ka libelela nako yetelele hahulu, leliñwi la mazazi aa. Ye kona hola. Usike wa

libelela ni hanyinyani. U inzi ona mwa tempele mo ko ukona kuina busihu kaufela inge ulapela.

²⁵⁶ Mulimu Yomunde, Ni lapela kuli U lume Moya o Kenile hape, inge moya wa liñungwa lelituna, utaze ndu kaufela, kasamulaho wa zibahazo ye petehile ye mo, musihali woo, kuli Wa pila ni sicaba. Ka Libizo la Jesu Krete. Ameni. 

65-0425 Sibaka Sa Lukisize Mulimu Sa Kulapelela
Embassy Hotel
Los Angeles, California U.S.A.

LOZI

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleñi ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org